

M359: Rudolf von Ems: Weltchronik (Z)

0,1800 man vindet ouch in India .
0,1801 pantier . unde tigrês diu sint dâ .
0,1802 daz pantier lebet in solicher art
0,1803 daz siechiu tier ûf sîne vart
0,1804 werdent in vile kurzer stunte
0,1805 von der reinicheit gesunt
0,1806 die sîn âtem ze aller zît
0,1807 in süezes smackes süeze gât
0,1808 wande ez enheine spîse zert
0,1809 anders . wan daz ez sich nert
0,1810 mit den reinesten wûrzen gar
0,1811 die diu erde ie gebar
0,1812 in dem lande . unde anderswâ .
0,1813 in Ganges dem wazzer dâ
0,1814 gânt æle grôz . unde niht ze kranc
0,1815 die – drîzic vûeze lanc
0,1816 sint . als üns diu wârheit seit
0,1817 daz selbe wazzer slangen treit
0,1818 die grôz unde egebære
0,1819 sint . si hânt krebezen schære
0,1820 sehs klâfter lanc . unde grôz erkant
0,1821 ez ist – enhein helfant
0,1822 sô starc . sô grôz si ziehen in
0,1823 zuoze in in daz wazzer hin
0,1824 sunder danc unde âne wer
0,1825 diu selben indischen mer
0,1826 ouch alse grôze sneggen hânt
0,1827 sô si ûz ire hiusern gânt
0,1828 unde diu belîbent lære
0,1829 sô machent jehent diu mære .
0,1830 die liute dâr ûz ire hûsgemach
0,1831 unde hânt hûs unde obedach
0,1832 in dem sneggen hûse genuoc
0,1833 daz ûf im êr der snegge truoc
0,1834 daz lant in India gebiret
0,1835 von agesteinen der dâr inne wirdet
0,1836 als ein grôz hôch gebirge wît
0,1837 der zûcket an sich ze aller zît

0,1838 daz îsen über des meres trân
0,1839 gewærlîche . unde âne allen wân
0,1840 ist ouch aldâ der adamas .
0,1841 der ist der art als er ie was
0,1842 daz er dem âgesteine
0,1843 benimet algemeine
0,1844 sîne tugent swâ er ist
0,1845 ouch mac in ze keiner vrist
0,1846 zerbrechen niht wan bockes bluot
0,1847 er ist ze manigen dingen guot .
0,1848 diu mir niht rehte sint bekant
0,1849 nû gât durch Indiam daz lant
0,1850 ein wazzer heizet Indus
0,1851 von dem geschriben stât alsus
0,1852 unde tuot diu wârheit uns gewis
0,1853 daz Indus unde Tigris
0,1854 diu wazzer ein lant scheiden dâ
0,1855 daz ist geheizen Parchia
0,1856 dâ drîzic lande inne lît
0,1857 mit sunder namen grôz unde wît
0,1858 alse daz lant Aretusa
0,1859 daz lît in dirre marke aldâ
0,1860 unde manic ander rîche lant
0,1861 daz hier diu schrift niht hât genant
0,1862 Assiria ist ouch dâ gelegen
0,1863 daz Assur der rîche degen .
0,1864 Semes sun . ein wîser man
0,1865 stifte . unde bî der zît huop an
0,1866 dâr sider eigenlîche
0,1867 diu wîten künincrîche
0,1868 dienten in den landen dâ .
0,1869 Persia . unde Media
0,1870 ligent in den lantmarken
0,1871 dâ sider die Monarchen
0,1872 inne wâren sezhaft
0,1873 der gewaltes hêrschaft
0,1874 vile nâch al diu erde
0,1875 in dienstlîchen werde .
0,1876 jensît mers dô zinsete sich
0,1877 ein ander lantmarke unde strich
0,1878 vâhet an Tigris gât
0,1879 unz an Eufraten . daz hât
0,1880 wîter künincrîche vile
0,1881 der ich ein teil hier nennen wile
0,1882 zwiscent den zwein wazzern dâ
0,1883 lît Mesopotamia
0,1884 dâr inne diu grôze Ninivê
0,1885 von der ich hân gesprochen êr

0,1886 an dirre lantmarke lît
0,1887 Babilônîe . ze einer sît
0,1888 dâr an lît Caldea
0,1889 Arabia . unde daz lant Sabba
0,1890 daz stifte Sabba bî den tagen
0,1891 von dem ir mich êr hôrtet sagen
0,1892 des vater Camis sun hiez Cus
0,1893 dâ – vindet man daz wîhe thûs
0,1894 daz wir nû heizen wîrouch
0,1895 an die lantmarke stoezet ouch
0,1896 Orep der berc . unde Sinai
0,1897 den sint gesezzen nâhe bî .
0,1898 die vrenchen Moabîten .
0,1899 Idumei . unde Ammonîten
0,1900 Sarrazîne . unde Madianîten
0,1901 unde dâ bî ze einer sîten
0,1902 die wilden Elamîten
0,1903 di bî den selben zîten
0,1904 dô wâren niht . si wurden sider
0,1905 unde liezen sich mit bûwe dâ nider .
0,1906 alse noch vliuzet unde vlôz
0,1907 Eufrates daz wazzer grôz
0,1908 unz an der – mitteln erde mer
0,1909 sitzet maniger lande her
0,1910 daz grôze künincriche wît
0,1911 Syria dâ zwischent lît
0,1912 Antioche . unde Damas
0,1913 der dannoch decheinez was .
0,1914 dô si sich nider liezen dâ .
0,1915 Fenix . unde Gomagena
0,1916 stôzent dâr an . daz sint zwei lant
0,1917 rîche . unde grôz . unde wîte erkant
0,1918 dâ lît ouch Tyrus . die Tiras
0,1919 der von Iaphet geboren was
0,1920 mit namen stifte schône .
0,1921 unde Sidonie diu von Sidone
0,1922 Canaanes sune gemachet wart
0,1923 an dirre selben ûzvar .
0,1924 unde dâr an leite spæhiu werc
0,1925 dâ bî Libanus der berc
0,1926 an des vuoze entspringent
0,1927 zwêne ursprunge . die bringent
0,1928 zesamene den Jordân
0,1929 der wazzer heizet einez Dan
0,1930 daz ander ist geheizen Jor
0,1931 der daz wort noch setzet vore
0,1932 unde iesâ dâr nâch setzet Dan
0,1933 sô sprichet ez rehte Jordân .

0,1934 her an stoezet ouch ein lant
0,1935 daz Palestina – ist genant
0,1936 Cananea . unde Judêa
0,1937 in disen lantmarken dâ
0,1938 ist gelegen Jerusalem
0,1939 die Sem der edel küninc Salêm
0,1940 stifte . unde Iebuseus .
0,1941 Canaanes sune . nû jihet alsus
0,1942 diu schrift gewærlîche
0,1943 daz kanaanEischiu rîche
0,1944 in den lantmarken sîn gelegen .
0,1945 Samarites der degen
0,1946 Canaanes sun ouch nante
0,1947 in Palestina dem lande
0,1948 eine veste in sînem namen dâ
0,1949 diu was genant Samaria
0,1950 Galilea ze einer sîte
0,1951 an disen selben landen lît
0,1952 diu ich genennet hân hier vore .
0,1953 dâ lît der hôhe berc Tabor
0,1954 unde Nazarêt . von der got Krist
0,1955 mennischlîche bûrtic ist .
0,1956 als üns diu wârheit tuot gewis
0,1957 dâ lît ouch Petapolis
0,1958 daz von vûnf steten hôhen rât
0,1959 unde wurde mit vile namen hât .
0,1960 Gomorra . unde Sodoma
0,1961 sît wurden ouch gebûwen dâ
0,1962 die got in daz apgründe
0,1963 versankte durch ire sünde
0,1964 dâ nû lît daz rôte mer
0,1965 dâ sitzt bî ein grôzez her .
0,1966 di Ismaheliten
0,1967 die an den jungesten zîten
0,1968 der werelte vüegent grôze nôt
0,1969 daz ist ein diet . die Nabaiôtch
0,1970 sît . Ismaheles sun gebar
0,1971 des sint zwelif geslehte schar
0,1972 die mit kreften sît vüre wâr
0,1973 gewahsen sint vile manic jâr
0,1974 der was dô bî den zîten niht
0,1975 dô sich vuogte – diu geschiht
0,1976 daz sich zerteilten diu kint .
0,1977 diu von Nôê geboren sint .
0,1978 die diet . die inseln . unde diu lant
0,1979 der houbetlant hier sint genant
0,1980 ane vâhent . dâ der sunne ûf gât
0,1981 ire lantmarke zil gestât

0,1982 an der mitteln erde mers zile
 0,1983 mit maniger diet . mit landen vile
 0,1984 die doch sint hier – genennet niht
 0,1985 an disiu lant man stôzen sihet
 0,1986 ôsterhalp Egiptelant
 0,1987 daz was dô Mesraim genant
 0,1988 nâch Camis sune Mesraim .
 0,1989 der stifte ez . unde nante ez nâch im .
 0,1990 sît hiez ez Canopea
 0,1991 nâch ire apgote den si dâ
 0,1992 an beteten . der hiez Canopus .
 0,1993 dâr nâch kam Egiptus
 0,1994 dar . mit gewalte in daz lant .
 0,1995 nâch des namen wart ez genant
 0,1996 als ez noch den namen hât
 0,1997 ôsterhalp ein marke an gât
 0,1998 an dem rôten mer . unde strecket sich
 0,1999 westert einen verren strich
 0,2000 tuot ez sîn underscheit erkant
 0,2001 unz an Libien daz lant
 0,2002 als üns diu wârheit beschiet
 0,2003 vier unde zweinzic liute diet
 0,2004 hât Egipte daz lant
 0,2005 ez ist veste unde guot erkant
 0,2006 unde mit vile grôzer kraft behuot
 0,2007 von hundert tûsent vesten guot
 0,2008 die in dem lande sint gelegen
 0,2009 dar kumet entweder snê noch regen
 0,2010 noch schate vüre der sunnen schîn
 0,2011 ez viuhtet mit dem vlôze sîn
 0,2012 Nilus der dâ durch vliuzet
 0,2013 er wehset . unde ergiuzet
 0,2014 sô sêre . daz er dannen . unde dar
 0,2015 daz lant übervliuzet gar .
 0,2016 unde machet ez mit sîner kraft
 0,2017 viuhte . veizet . unde berhaft
 0,2018 daz ûf der erde im ebenrîche
 0,2019 dechein lant ist noch gelîch
 0,2020 an landes güete mit genuht
 0,2021 an genühticlicher vruht
 0,2022 ist bezzer lant niht anderswâ
 0,2023 dâr inne lît Tebaida
 0,2024 unde Alexandria
 0,2025 die vore zageheit der vrîe
 0,2026 Alexander – – stifte sît
 0,2027 über maniger hundert jâre zît
 0,2028 einsît ist an daz lant gesazt .
 0,2029 Babilônîe ein houbetstat .

0,2030 wîter künincrîche
 0,2031 disen landen algelîche
 0,2032 ist anderhalb ein underscheit
 0,2033 mit undermarke an geleit
 0,2034 von Kaukasas von Calpia
 0,2035 daz ôstert ist gelegen dâ
 0,2036 biz vile bî ander marke zile
 0,2037 dâ lît entzwschent lande vile .
 0,2038 Amazones diu vrenchen wîp
 0,2039 die mit kraft werlîchen lîp
 0,2040 hânt . die sitzent dâr inne
 0,2041 mit vrevellîchem sinne
 0,2042 stêt ire gemüete ûf mannes wer
 0,2043 der lant . gebirge . unde mer .
 0,2044 besliuzet allenthalben
 0,2045 mit hôhen vesten alben
 0,2046 beslozen sint die – stolzen
 0,2047 Sarmarten . unde Kolzen
 0,2048 Massageten unde Seres
 0,2049 von den ich bin bewîset des
 0,2050 daz si ze dem êrst mit wîsheit
 0,2051 begunden machen sîdîn kleit
 0,2052 unde swaz von sîden ist erkant
 0,2053 der lant stoezet an disiu lant .
 0,2054 dâr an stoezet Baktria
 0,2055 daz lant . unde Ircania
 0,2056 dâr inne vogel vliegent
 0,2057 ob ûns diu buoch niht liegent
 0,2058 der gevider gît sô liechten schîn
 0,2059 daz si die naht mûgen sîn
 0,2060 verborgen . swenne ez vinster ist .
 0,2061 man sehe si schînen alle vrist
 0,2062 reht als ein licht daz vaste
 0,2063 gît licht mit brennendem glaste .
 0,2064 bî disen landen ze einer zît
 0,2065 ligent zwei lant grôz unde wît
 0,2066 der einez ist Cicia genant .
 0,2067 daz ander Huma . diu zwei lant .
 0,2068 vier unde zweinzic diete hânt
 0,2069 die in den landen sich begânt .
 0,2070 dâ sint gelegen nâhe bî
 0,2071 monses Iperborei
 0,2072 dâ stoezet allernæhest an .
 0,2073 Albania . di wîp . unde man .
 0,2074 sint in wîzer varwe gar
 0,2075 schoene . blanc . unde – wîz gevar .
 0,2076 daz unz an Armenie gât .
 0,2077 dâr inne die berge Ararâch .

0,2078 ligent . dâr ûfe sich nider lie
0,2079 als ich êr hân gesprochen hier
0,2080 diu arke von der ich êr las
0,2081 dâr inne Nôê genas
0,2082 mit aller lebender geschäft
0,2083 als ez gebôt diu gotes kraft .
0,2084 dâr an lît Iberia
0,2085 daz lant . unde Capadoria .
0,2086 dâr inne werdent swinde
0,2087 tragende von dem winde
0,2088 diu berntiu ros . alse daz geschihet
0,2089 daz man daz vül geworfen sihet
0,2090 ez lebet niht vürebaz wan driu jâr
0,2091 unde danne stirbet ez vüre wâr .
0,2092 dâ stoezet an ein michel lant
0,2093 daz ouch ist houbetlant genant
0,2094 vile lande . diu dâr inne sint
0,2095 maniger hande liute kint
0,2096 hât daz selbe lant mit wer
0,2097 ez ist gelegen in dem mer .
0,2098 daz vile nâch al dâr umbe gât
0,2099 unde ez mit wer beslozen hât
0,2100 daz ist diu minner Asia
0,2101 in disem houbetlande dâ .
0,2102 Ephesus diu stat nû ist
0,2103 dâr inne der grôze êwangeliste
0,2104 sante Johannes lange sider
0,2105 sich lie mit sîner ruowe nider
0,2106 üns allen sæliclîche .
0,2107 daz êrste künincrîche
0,2108 daz in der minner Asia
0,2109 lît . daz ist Bittina .
0,2110 Berika daz ander hiez .
0,2111 Migdonia an daz selbe stiez
0,2112 Nicea . unde Nicke
0,2113 von den wir lesen dicke
0,2114 an andern buochen anderswâ
0,2115 ligent in Bittina
0,2116 dâr an gelegenlîche
0,2117 lît Frigia daz rîche
0,2118 daz ist al hêrlîche besetzt
0,2119 mit Smirna der houbetstat
0,2120 dirre stete houbetlant
0,2121 ist diu mêre Frigia genant
0,2122 ouch lît Galatia dâ bî
0,2123 waz der bîlande mêre sî
0,2124 diu minner Frigia dâ lît
0,2125 unde Darkania . dâ sît

0,2126 Trôje diu rîche in wart geleit
0,2127 mit krefticlîcher werdicheit .
0,2128 Ziconia . unde Caria
0,2129 dâ bî ligent . unde Lidia
0,2130 diu lant . diu künincrîche grôz
0,2131 dâr an Tiatria sich slôz
0,2132 diu stat . diu sich noch sliuzet ze in
0,2133 zuo disen künincrîchen drîn
0,2134 heftet sich mit gelegenheit
0,2135 Isauria sô man noch seit
0,2136 als ez diu schrift bescheiden kan
0,2137 Cilicia daz stoezet dâr an
0,2138 ein lant daz ist genant alsus
0,2139 Amana . unde Taurus
0,2140 zwei gebirge hôch erkant
0,2141 diu scheident disiu selben lant
0,2142 unde ire undermarke aldâ .
0,2143 dâr an stoezet Licia
0,2144 Persida . unde Pamphylia
0,2145 Pontos ist ouch gelegen dâ
0,2146 ein lant . daz maniger liute her
0,2147 hât vile . des landes næheste mer
0,2148 noch heizet mare ponticum
0,2149 hier ist der lantmarke drum
0,2150 diu von der erde gelegenheit
0,2151 gein dem dritten teile seit
0,2152 der teil . der lande houbetlant
0,2153 ist diu grôze Asia genant
0,2154 dâr inne albesunder
0,2155 sint diu vile grôzen wunder
0,2156 unde diu lant als ich mich verstân
0,2157 von den ich hier gesprochen hân .
0,2158 in dem dritten teile – der erde hier .
0,2159 sich dô mit bûwe nider lie
0,2160 Sem unde der geslehte kint
0,2161 als iuch ire namen genennet sint
0,2162 wande in der teil ze teiles wart
0,2163 an dirre selben ûzvalt
0,2164 dâ si sich teilten in diu lant
0,2165 swie dirre teil in wære benant
0,2166 der sêre ist ûf gewachsen sider
0,2167 Camis kinde lie sich nider
0,2168 vile in Semus – teile zuoze im .
0,2169 als in Egipte Mesraim .
0,2170 Canaanes kint in al diu lant
0,2171 diu si mit gewaltes hant
0,2172 besâzen dô diu selben zil
0,2173 wan ire geslehtes was sô vile

0,2174 daz ire dritteil . in ze enge schein
 0,2175 gein den andern bruodern zwein .
 0,2176 durch solichen krieg zôch sich Salem
 0,2177 Semes sun ze . – Jerusalêm
 0,2178 dâ Iebuseus als ich ez las
 0,2179 Canaan sun ouch inne was .
 0,2180 nâch den si beiden wart genant
 0,2181 den ander dritteil . unde des lant
 0,2182 der teil si besitzen solten
 0,2183 unde ze teile besitzen wolten
 0,2184 Iaphetes kint dô bî den tagen
 0,2185 wile ich nennen unde sagen
 0,2186 ire namen . unde ire lande underscheit
 0,2187 nâch ire rehter gelegenheit
 0,2188 des andern teiles anevanc .
 0,2189 zil . undermarke . unde umbevanc .
 0,2190 lant . unde liute . unde der stift
 0,2191 nennet üns alsus diu schrift .
 0,2192 Europa heizet der teil
 0,2193 des slihtic undermarke seil
 0,2194 sich von norden rihtet
 0,2195 sîn underscheit sich slihtet
 0,2196 dâ jene lantmarke ende hât
 0,2197 dâ dirre dritte teil ane gât
 0,2198 dâ sint gelegen nâhe bî
 0,2199 die berge montes Riphei
 0,2200 unde Danais ein wazzer grôz
 0,2201 des vluz die lantmarke undervlôz
 0,2202 als ez noch bî dirre zît
 0,2203 ein wüeste grôz . mosic unde wît .
 0,2204 Meotides Paludes
 0,2205 als üns diu wârheit wîset des
 0,2206 ist ouch der marke aldâ ein zil
 0,2207 dâr an stoezet lande vile
 0,2208 in dem teile vüre . unde wider
 0,2209 dâ lît Cicia diu nider
 0,2210 daz houbetlant . vile lange ez hiez .
 0,2211 der marke unde umbekreiz dâr an stiez
 0,2212 des landes name unde rehter strich
 0,2213 hebet nordent an . unde endet sich /
 0,2214 an der Tuonouwe
 0,2215 in der lantmarke schouwe
 0,2216 gelegen ist Alania
 0,2217 Gottia . unde Dania .
 0,2218 unde lande vile diu nâch der zît
 0,2219 nâch in genennet wurden sît .
 0,2220 von der Tuonouwe als si gât
 0,2221 unde ire vluz dâ den namen hât

0,2222 unz an die hôhesten albe hin
0,2223 ist als ich bewîset bin
0,2224 diu ober Germania gelegen
0,2225 diu den namen hât gewegen
0,2226 nâch allen diutischen landen
0,2227 von den . die ez sus nanten
0,2228 nâch den sint alliu diutischiu lant
0,2229 noch Germania genant
0,2230 weliche der undermarke sîn
0,2231 westert scheidet si der Rîn
0,2232 nordent diu Elbe als si noch gât
0,2233 diu die marke unterscheiden hât .
0,2234 unde ir gezilete marke gât
0,2235 in disem teile Swâben lît .
0,2236 daz Alemannia hiez êr
0,2237 nâch – Alemanne dem Bodemsê .
0,2238 der in der Swâbe lande swebet
0,2239 durch den mit rîchen vluzze strebet
0,2240 der Rîn . des vluz noch strîchet hin
0,2241 von disen lantgebirgen dâr in .
0,2242 der von dem sunder teile gât
0,2243 nordent ze tal . unde den vluz hât
0,2244 unz in daz grôze nortmer
0,2245 bî dem Rîne lît mit wer
0,2246 manic veste wole bereite
0,2247 nâch rîchelîcher werdicheit
0,2248 vile werlich . unde rîche erkant
0,2249 diu êrste ist Constanze genant .
0,2250 di der – edel degen guot
0,2251 unverzaget . unde hôchgemuot
0,2252 ein roemischer küninc rîche
0,2253 stifte werdiclîche
0,2254 er hiez keiser Constantinus
0,2255 nâch im sô nante er si alsus
0,2256 unde tet ire namen sô erkant
0,2257 daz si ist Constanze genant .
0,2258 dâr nâch bî des Rînes vluot
0,2259 sô lît ein veste unmâzen guot
0,2260 Basel diu vile werde
0,2261 daz niender ûf der erde
0,2262 bedarf bezzer veste sîn
0,2263 si hât korn . unde guoten wîn .
0,2264 volliclîche grôze genuht .
0,2265 ouch hât si den bezzisten luft
0,2266 der in keinem lande möhte wesen
0,2267 daz spriche ich wan ich hân ez gelesen
0,2268 dâr zuo ist si gevestet
0,2269 gewæhet . unde gegestet .

0,2270 mit maniger burc vile schône
0,2271 die si reht als ein krône
0,2272 zierent mit werlîcher kraft
0,2273 in Basel sint ouch ellenthaft
0,2274 mit hûse inne gesezzen
0,2275 ze aller zît vermezzen
0,2276 vûnvzic ritter oder mêr
0,2277 die man niemer widerkêr
0,2278 sihet tuon ze kinden
0,2279 ze vrouwen noch gesinden
0,2280 ê daz si gesiget hânt
0,2281 ouch tuon ich iuch noch mêr erkant
0,2282 dâ ist guot alles guotes
0,2283 dâ ist des heiligen – bluotes
0,2284 des von gotes herzen vlôz
0,2285 daz er durch ünsich alle gôz
0,2286 an dem vrônekriuze her
0,2287 dâr an er hienc verwundet sêr
0,2288 dâ ze Calvaria
0,2289 des selben kriuzes ist ouch dâ
0,2290 ze Basel in der houbetstat
0,2291 dâ von si sô vile lobes hât
0,2292 daz si nieman volloben kan
0,2293 werlîchiu lant diu stôzent dâr an
0,2294 diu mit rîcher genuht
0,2295 bringent manige sûeze vruht
0,2296 sô lît als ich bewîset bin
0,2297 nâher nâch bî dem Rîne hin
0,2298 ein schoene wünniclîchiu stat
0,2299 Strâzburc si den namen hât
0,2300 si ist gezieret schône
0,2301 si ist des landes krône .
0,2302 bî der stat vile nâhe bî
0,2303 über kleiner rasten drî
0,2304 ligent silberberge rîche
0,2305 grôze . hôhe wünniclich .
0,2306 daz silber daz dâ wirdet gegraben
0,2307 sô ez wirdet gebrant . sô wirdet ez erhaben
0,2308 unde wirdet gevüeret in die stat
0,2309 ze Strâzburc . dâ von si vile sat
0,2310 ist von silber . unde hêr
0,2311 dâ von nâch der buoche lêr
0,2312 Strâzburc . in lingua latina
0,2313 heizet Argentina .
0,2314 in diutisch ein silberstat – genant
0,2315 durch daz wande alliu diutischiu lant
0,2316 beidiu hier . unde dâ . unde dort .
0,2317 den vile keiserlîchen hort

0,2318 antwürten dar . unde si vürebaz
0,2319 ze Rôme dâ der keiser saz .
0,2320 üns kündet ouch diu rehte zal
0,2321 daz bî dem Rîne hin ze tal
0,2322 lît Spîre wole gevestenet
0,2323 dâ manige künige restent
0,2324 unde dâ wartente sint
0,2325 wenne kome der megede kint
0,2326 gebietente den strengen sent
0,2327 dem si danne rede ergênt
0,2328 unde vile gar ze rehte stânt
0,2329 wie si sîn liut gerihtet hânt .
0,2330 ouch sulent ir vüre wâr wizzen daz
0,2331 daz zwischent Strâzburc . als ich las
0,2332 unde Spîre . lît ein drilich berc
0,2333 als – üns seit der wârheit werc
0,2334 dâ von er Drivels ist genant
0,2335 in allen landen wole erkant
0,2336 wande dâ sint ûfe schône
0,2337 des rîches sper . unde krône
0,2338 die dâ mit hôher wurde sint .
0,2339 ez ist diu krône die daz kint .
0,2340 der megede sun got Jêsus Krist
0,2341 der aller dingen schepfær ist
0,2342 der alliu dinc in sîn gewalt
0,2343 besliuzet . kleine . grôz . junc . unde alt .
0,2344 himel . erde . wazzer . steine .
0,2345 unde der helle gruft gemeine .
0,2346 berihtet er mit sîner kraft
0,2347 sîn – gewalt hât alliu dinc behaft
0,2348 der – dise selbe krône truoc
0,2349 der wârheit weiz man vile unde genuoc .
0,2350 nâch Spîre . bî dem Rîne sâr
0,2351 lît ein stat Wormatia
0,2352 diu selbiu diu ist vile guot
0,2353 dâr nâch bî des Rînes vluot
0,2354 lît Megenze vile vermezen
0,2355 ein erzebischof ist dâ gesezen .
0,2356 üns seit diu histôria
0,2357 daz nâch dem Moin Moguntia
0,2358 sî disiu selbiu stat genant
0,2359 si ist vile verre wole erkant .
0,2360 dâr nâch bî des Rînes vlôze
0,2361 lît Kölne ein stat diu ist vile grôz
0,2362 unde in hôher schouwe gar .
0,2363 diu mære sagent üns vüre wâr .
0,2364 diu stat sî sælden rîche
0,2365 wande dâ stætclîche

0,2366 restent grôzer heiligen vile
0,2367 der ich ein teil hier nennen wile
0,2368 Caspar . Baltasar . unde Melchior .
0,2369 die drîe künige . die hier vore
0,2370 ire opfer gote brâhten
0,2371 unde vile balde gâheten
0,2372 gein Bêthlêhêm hin dâ er was
0,2373 dâ sîn sîn muoter maget genas .
0,2374 maget dâ vore . unde maget dâr nâch
0,2375 ze Jêsu Christû was in gâch
0,2376 mit hôher küniges zûhte gar
0,2377 bôt im der eine wîrouch dar .
0,2378 der ander küninc rîche
0,2379 vile gar zühticliche
0,2380 bôt er mirren ze opfer gar .
0,2381 dô gie der dritte küninc dar
0,2382 vile zühticliche er sich lie
0,2383 ûf der erde an sîniu kniewe
0,2384 unde brâhte küninlichen solt
0,2385 gote ze opfer edel golt .
0,2386 die drîe künige die nû hât
0,2387 diu schrift genant . sint ze der stat
0,2388 ze Kölne . dâ von man si wole
0,2389 von rehten schulden loben sol .
0,2390 swem niht behaget der paragraf
0,2391 unde von dem Rîne dirre klaf .
0,2392 der sol daz ze lône hân
0,2393 er sol ez ungelesen lân .
0,2394 unde lebe er aller sorgen bar .
0,2395 nû seit diu schrift üns ouch vüre wâr .
0,2396 in Swâben landen springet
0,2397 diu Tuonouwe . unde bringet
0,2398 in mare ponticum mit kraft .
0,2399 sechzic wazzer manhaft
0,2400 daz Ôstermer dâr in si gât
0,2401 ire vluz . ire runs . geteilet sich hât
0,2402 in siben grôze strangen
0,2403 ê daz ire vluz gegangen
0,2404 kome in daz mer . dâ si sich in
0,2405 mit ire vluzze rihtet hin .
0,2406 als üns diu wârheit tuot erkant
0,2407 an Swâben stoezet Baierlant .
0,2408 ze tal al sunder wanken
0,2409 unde dâr nâch – Ôstervranken
0,2410 dâ entzwschent unde dem Rîne lît
0,2411 Rînvranken ze der western sîte
0,2412 diutischer lande gêt ein gêr
0,2413 über Rîn . des teiles kêr

0,2414 gêt ein sîte an walhischiu lant
0,2415 als Hollant . unde Brâbant
0,2416 unde Sêlant . dâ der selbe strich
0,2417 von walhischen landen scheidet sich
0,2418 an Ôstervranken stoezet dâ
0,2419 Düringen daz lant . dâr nâch sâr
0,2420 ist dâr an mit kraft gewahsen
0,2421 daz starke lant ze Sahsen
0,2422 unde des hêrschefte nâch ire zal
0,2423 bî der Elbe hin ze tal
0,2424 unz an daz ende sint diu lant
0,2425 diu nider Germania genant
0,2426 in dirre lantmarke
0,2427 ist gelegen Tenemarke
0,2428 unde landen . unde inseln vile diu dar
0,2429 eigenlîche hoerent gar
0,2430 als ich hân vernomen êr
0,2431 nordent über den wilden sê .
0,2432 daz grôze lant ze Sweden lît
0,2433 unde Norwæge daz alse wît
0,2434 ist . als wir dicke hân vernomen
0,2435 daz im kan nieman ze ende komen
0,2436 von grôzer wilde . unde daz diu naht
0,2437 sô vile des landes hât bedaht
0,2438 mit vinster trûebe . daz kein man
0,2439 dem lande ze ende komen kan
0,2440 als vore der vinster in gezimet
0,2441 diu im des tages licht benimet .
0,2442 unde der lantmarke schouwe
0,2443 von der grôzen Tuonouwe
0,2444 unz an daz hôhe Mittelmer
0,2445 lît âne widerrede wer
0,2446 vile hôher lande houbetlant
0,2447 ein lant ist Messia genant
0,2448 dâr vile lande ist undertân
0,2449 vûre wâr als ich gelesen hân
0,2450 diu nider Pannonia
0,2451 nimet ire marke . ire namen dâ
0,2452 daz sint windischiu rîche
0,2453 diu heizent wærlîche
0,2454 Pannonia . unde teilent sich
0,2455 in wîter lande verre strich .
0,2456 dâr inne Bulgarie
0,2457 unde daz lant ze Rumenîe .
0,2458 unde dâr an stoezet danne ein lant
0,2459 daz ist Tracia genant
0,2460 daz bî den zîten Tiras
0,2461 Iaphetes sun . als ich ez las

0,2462 stifte an der êrsten ûzvalt
0,2463 dâ êrst diu erde bûhaft wart
0,2464 als man ire lant noch niuzet .
0,2465 durch disiu rîche vliuzet
0,2466 der Nepper . der durch Riuzen gât
0,2467 diu lantmarke niht ende hât
0,2468 biz hin dâ Constantinopel lît
0,2469 dâ diu lantmarke ende gât
0,2470 unde danne Kriechen hebet an
0,2471 dô man Kriechen êrst began
0,2472 stiften . dô nante ez nâch im
0,2473 Iaphetes sun . mit namen Cetim
0,2474 den ich ouch hân genennet êr
0,2475 diz was der zît . dâr nâch Nôê
0,2476 ez stifte . des geslehtes hêrr
0,2477 von den an daz grôze Mittelmer
0,2478 sint al diu rîche . unde diu lant
0,2479 Kriechen mit einem namen genant .
0,2480 vile lande in Kriechen ist gelegen
0,2481 dâr inne man noch sihet pflegen
0,2482 mit gewalte schône
0,2483 vile küninclicher krône
0,2484 unde dâr under gegene vile .
0,2485 in kriechischer marke zile
0,2486 Dalmazia . unde Epirus lît
0,2487 zwei lant . in landes groeze wît .
0,2488 an diu stoezet nâhe aldâ
0,2489 Conia . unde Molosia .
0,2490 unde Elladia daz lant .
0,2491 ein lant ist Attika genant
0,2492 dâr in mit rîchheit ist gesazt
0,2493 Athêne ein houbetstat
0,2494 Peloponens . unde Aonie .
0,2495 Tessalia . unde Macedonie
0,2496 Salnecge . unde Emacia
0,2497 in disen selben landen dâ
0,2498 ist gelegen Olipapus
0,2499 ein berc der ist genant alsus .
0,2500 des joch in solicher hoehe stât
0,2501 daz ez unz in die lûfte gât
0,2502 dâ ligent gelegenliche
0,2503 diu grôzen künincliche
0,2504 Corintus unde Achaia
0,2505 Sizionia . unde Arkadia
0,2506 diu kriechischiu lantmarke hât
0,2507 bevangen als ire name gât
0,2508 unde hier vore unterscheiden .
0,2509 ist mit den marken beiden .

0,2510 dem mer . unde mit den landen
0,2511 diu wir hier vore êr nanten
0,2512 als üns ire underscheit ire stift
0,2513 genennet hât diu rehtiu schrift
0,2514 diu noch vürebaz üns wîset hier
0,2515 bescheidenlîche rehte wie .
0,2516 sîn unterscheiden . unde genant
0,2517 der bilande houbetlant
0,2518 diu alhier genennet sint
0,2519 an dirre lantmarke underbint
0,2520 stoezet mit namen dâ
0,2521 diu oberiu Pannonia
0,2522 diu windischer sprâche lant
0,2523 tuot . unde ire underscheit erkant
0,2524 diu nâch erkantlîchen siten
0,2525 disiu lant hât undersniten
0,2526 unde ire namen rehtiu zil
0,2527 mit landen . mit hêrscheften vile
0,2528 der name in dirre marke lît
0,2529 disiu lantmarke wît
0,2530 biz an daz hôhe gebirge gât
0,2531 daz diutischiu lant gescheiden hât
0,2532 gein ôstert . unde walhischiu lant
0,2533 unde windische marke . tuot erkant .
0,2534 des selben gebirges strich
0,2535 beginnet gein Marsilie sich
0,2536 mit anevange heben an
0,2537 unde strecket verre sich hin dannen
0,2538 nebent diutischen landen ze einer sîte
0,2539 biz dâ diu erde ein ende gît
0,2540 unde daz mer . mit im diu lant
0,2541 tuot nâch ire underscheide erkant
0,2542 die dâr inne ligent . unde dâ bî
0,2543 – Appenninî .
0,2544 daz gebirge – ist sus genant
0,2545 unde scheidet windischiu lant
0,2546 von diutischen landen hin danne .
0,2547 diu an Ungern hebent an
0,2548 in der undermarke wît
0,2549 vile lande unde künincrîche lît .
0,2550 unde maniger hande liute diet .
0,2551 der sundersprâche dâr in gerieten
0,2552 unde sich dâr in hânt gemezzen .
0,2553 den Ungern sint gesezzen
0,2554 innewentic ire klûse tore
0,2555 unde ire lantmarken dâ vore
0,2556 windischer lande vile
0,2557 innerhalp ire klûse zile

0,2558 Kotziler . unde Kolzel sint
0,2559 unde manige unkristenlîchiu kint
0,2560 in vremeden sundersprâchen .
0,2561 Valwen . unde wilde Vlachen .
0,2562 jensît des snêberges hant
0,2563 sint lant . diu si begânt .
0,2564 innewentic Ungern sint diu lant
0,2565 gelegen . diu hier sint genant
0,2566 innerhalp ire klûse tore .
0,2567 westerhalben lît dâ vore
0,2568 Stîre . unde Ôsterrîche
0,2569 stôzent gelegenlîche
0,2570 an Ungern . mit den beiden
0,2571 marken . ist gescheiden
0,2572 diutischiu lant . von windischen landen
0,2573 die al die erde erkanten
0,2574 die hânt üns sus mit wârheit
0,2575 der lande gelegenheit geseit
0,2576 sunder zwîvellîchen wân
0,2577 Bêheim . Merhern . Pôlân .
0,2578 unde daz lant ze Riuzen
0,2579 Liflant . unde Priuzen .
0,2580 in windischer lande marke lît
0,2581 gein sundert lît ouch ze einer sîte
0,2582 Kernten . diu windische lant
0,2583 in latîne sint genant
0,2584 diu oberiu Pannonia
0,2585 den underscheit der lande dâ
0,2586 diu schrift alsus bescheiden hât
0,2587 als alhier geschriben stât .
0,2588 über appennischiu rîche lît
0,2589 dâ windischiu lantmarke ende gît
0,2590 Italia diu mit dem mer
0,2591 unde mit den bergen ist ze wer
0,2592 beslozzen vesticlîche
0,2593 dâr inne roemesch rîche
0,2594 den urhap sînes namen hât
0,2595 unde dâ der stuol inne stât
0,2596 dâ man der kristenheit sol geben
0,2597 lêre . unde kristenlîchez leben
0,2598 die man nâch gotes gebote wole
0,2599 geistlîche dâ vinden sol
0,2600 dâ ligent inne rîchiu lant
0,2601 der houbetname ez ist genant
0,2602 Sicilia . unde diu lant vile gar
0,2603 diu mit namen hoerent dar
0,20382 nû sündeten aber sêre an gote
0,20383 wider gotes ê gebote

0,20384 diu kint der israhêlischen diet
0,20385 dâr umbe got von in dô schiet
0,20386 sîn hulde unde sîner helfe kraft
0,20387 Philistim die heidenschaft
0,20388 liez er si twingen daz ist wâr
0,20389 eigenlîche vierzic jâr
0,20390 daz si in dienten âne ire danc
0,20391 ire eigenschefte joch si twanc .
0,20392 daz si aber got an riefen
0,20393 mit herzen – sûften tiefen
0,20394 daz er ire nôt erkante
0,20395 unde sîne helfe in sande
0,20396 wan in die heiden tâten wê
0,20397 dô tet got also dâ vore êr
0,20398 unde sande in sîner helfe trôst
0,20399 wie si wurden dô erlôst
0,20400 unde von weme . daz wile ich sagen
0,20401 ez was dô bî den selben tagen .
0,20402 ein man gesezzen in Pharan
0,20403 ûz dem geslehte von Dan .
0,20404 was er bûrtic . unde geboren
0,20405 der hôhesten einer ûzerkoren
0,20406 den man in dem geslehte vant
0,20407 der was Manue genant
0,20408 der nam von sînem künne ein wîp
0,20409 diu was sô schoene . daz ire lîp .
0,20410 was mit lobelîcher kraft
0,20411 vile wît erkant . unberhaft
0,20412 was si . an bernter genuht
0,20413 ich meine mennischlîcher vruht
0,20414 wart si nie muoter êr genant
0,20415 der wart eines tages gesant
0,20416 von gote ein himelischer bote
0,20417 ein engel der kunte ir von gote
0,20418 ein vrôuwederîchez mære
0,20419 swie si unberhaft wære
0,20420 got wölte si der sælden wern
0,20421 daz si solte ein sun gebern
0,20422 der gotes gewîheter hieze
0,20423 daz si den niht lieze
0,20424 trinken bî den zîten sîn
0,20425 dechein trinken . oder wîn .
0,20426 oder iht daz in sô swachte
0,20427 daz ez in trunken machete
0,20428 unde im niht schriete sîniu hâr
0,20429 wan er solte al vüre wâr
0,20430 gotes erwelter sîn genant
0,20431 unde er solte mit sîner hant

0,20432 loesen Israhel mit kraft
0,20433 von Philistim der heidenschaft
0,20434 diu vrouwe kêrte wider dannen
0,20435 unde seite – disiu mære ire manne
0,20436 waz si hâte dort gesehen
0,20437 ouch begunde si verjehen
0,20438 wie schoene der bote wære
0,20439 der ir sô hôhiu mære .
0,20440 mit süezem trôste tet erkant
0,20441 Manue began zehant
0,20442 trûren . daz der engel niht
0,20443 komen was an sîn gesiht
0,20444 des wart er âne mâze unvrô
0,20445 mit triuwen riet diu vrouwe dô
0,20446 daz si got bæten daz er in
0,20447 sande aber sînen engel hin
0,20448 der in mit lêre tete kunt
0,20449 die gotes boteschaft anderstunt
0,20450 als er ir dâ vore tet
0,20451 hier umbe tâten si ire gebet
0,20452 mit inniclichem muote gar
0,20453 dô sande in got den engel dar
0,20454 den er der vrouwen hâte gesant
0,20455 der tet Manue bekant .
0,20456 die boteschaft . als der vrouwen êr
0,20457 dô bat der guote Manue
0,20458 den engel . daz er sæze
0,20459 zuoze in . unde mit in æze
0,20460 ein – kitze was schier bereit
0,20461 unde brôt mit süezer reinicheit
0,20462 daz der engel sölte
0,20463 ezzen . ob er ezzen wölte .
0,20464 der engel sprach . “ich izze es niht
0,20465 opfer ez hier vore gotes gesiht
0,20466 ûf disen stein” dô daz geschach
0,20467 Manue ze dem engel sprach
0,20468 “hêrre wie ist der name dîn”
0,20469 “waz wilt dû des namen mîn
0,20470 der wunderlich ze nennenne ist”
0,20471 dô wart an der selben vrist
0,20472 ûf daz opfer dar gesant
0,20473 ein viur . daz opfer wart verbrant
0,20474 unde der engel schiet von in
0,20475 mit der viures vlammen hin
0,20476 daz si ez beidiu sâhen an
0,20477 erschrockenliche sprach der man
0,20478 “nû sterben wan daz muoz geschehen
0,20479 sît daz wir got haben gesehen

0,20480 des muoz ersterben ünser lîp”
0,20481 “niht” sprach dô daz wîse wîp
0,20482 “got ünser opfer hât genomen
0,20483 daz sol üns ze heile komen
0,20484 unde hât künftige wârheit
0,20485 von ünserm kinde üns geseit
0,20486 des sulen wir sîn von gote vrô”
0,20487 dâr an in rehten zîten dô
0,20488 wart Manue sîn sun geboren
0,20489 ein kint nâch wunsche ûzerkoren
0,20490 daz wart Sampson genant
0,20491 als in – der engel tet erkant
0,20492 der in von gote als ich êr las
0,20493 gesant in gotes boteschaft was
0,20494 Samson in sîner kintheit
0,20495 begunde als noch diu wârheit seit .
0,20496 wahsen . unde legen zuo
0,20497 beidiu spâte unde vruo
0,20498 in sîner jungen kindes – jugent
0,20499 er wuohs mit kraft – – an mannes tugent
0,20500 in wunschlicher volleist
0,20501 got sande zuoze im sînen geist
0,20502 sô vollicliche swer in sach
0,20503 oder in vernam . daz im der jach
0,20504 swenne er gewüehse in sîne tage
0,20505 er würde ein gotes wîssage
0,20506 unde gotes kempfe an vrecher wer
0,20507 von Dan . in des – geslechtes her .
0,20508 wart er ze den hôhesten schiere erkoren
0,20509 dô der degen wolegeboren
0,20510 in sîner kindes jungent began
0,20511 wahsen . unde er wart ein man .
0,20512 er vuor eines tages gein Tampna
0,20513 in der heidene lande dâ
0,20514 solte ein hôchgezît geschehen
0,20515 dar gâhete er . er wolte si gesehen
0,20516 durch sîn vürewitze er kam dar
0,20517 als er dar kam . er wart gewar
0,20518 einer megede schoene . unde minniclich
0,20519 nâch der begunde er senen sich
0,20520 sô sêre daz er gedâhte sider
0,20521 ze vater unde ze muoter wider
0,20522 unde sagete in als ich hân verjehen
0,20523 daz er hâte in Tampna gesehen
0,20524 ein wîp die müeste er hân . – daz sie
0,20525 im ze wîbe gâben die
0,20526 sîn vater . unde sîn muoter
0,20527 die sprâchen “ach sun vile guoter .

0,20528 wer hât dich an den willen brâht
0,20529 daz dû ze nemenne hâst gedâht
0,20530 dir ein wîp von Philistim”
0,20531 si beidiu dô begunden im
0,20532 die unbesniten heidene
0,20533 unde ire tohtern leiden
0,20534 swenne er wîp im wolte nemen
0,20535 sô solte wîbes im gezemen
0,20536 von sînes geslehtes vruht
0,20537 unde von den heidenen hân die vluht
0,20538 daz von der vruht ire irricheit
0,20539 sîn – geslehte iht würde hin – geleit
0,20540 gein des hôhesten gotes gebote
0,20541 dô wisten si niht daz von gote
0,20542 diz was êr geboten . unde dô
0,20543 daz ez solte sîn alsô
0,20544 daz got gedâhte wunders mite
0,20545 durch des selben wunders site
0,20546 schuof den jungen degen – sâr
0,20547 gotes orden . unde gie gein Tampna
0,20548 zuo den heiden Philistim
0,20549 ûf dirre vart vuor dô mit im
0,20550 der vater . unde diu muoter sîn
0,20551 unde tâten im des volge schîn
0,20552 daz si mit im wolten dar
0,20553 enden sînen willen gar .
0,20554 dô si mit im . unde er mit in
0,20555 vuoren ûf der vart dâ hin
0,20556 unde si begunden nâhen
0,20557 dort her begunde . gâhen
0,20558 ein lewe gein in starc unde fier
0,20559 sô grimmicliche vuor daz tier
0,20560 gein in . daz si dô sunder wân
0,20561 den lîp verloren wântên hân
0,20562 von sînen sîten manicvalt
0,20563 Samson der edel degen balt
0,20564 lief dô mit blôzen handen dar
0,20565 unde unbereit ze wer vile gar
0,20566 unde brach dem lewen sâr zestunt
0,20567 von dem houbete ûf den munt
0,20568 daz er âne wer lac tôt
0,20569 der minne liebe im dô gebôt
0,20570 daz er die selben vrouwen nam
0,20571 ze wîbe . dô er zuoze ir kam
0,20572 er mahelte si . unde wart – enein
0,20573 daz si kêrten wider heim
0,20574 unde dâr nâch wider kâmen sît
0,20575 ze der brâtloufte hôchgezît

0,20576 als von in dâ was ûf geleit
0,20577 dô si wurden sît bereite
0,20578 unde hin wider wolten
0,20579 ze dem brûtluft als si solten
0,20580 Samson hin mit den sînen gie
0,20581 dâ er den lewen êr ligen lie
0,20582 dem hâte in sînem munde
0,20583 genistet al die stunte
0,20584 von imben ein michel swarm
0,20585 der dâr in durch nisten was gevarn
0,20586 unde hâte in dem selben zile
0,20587 gebrüetet dâr inne honiges vile
0,20588 Samson der edel wîgant
0,20589 nam dô des honiges mit sîner hant
0,20590 unde bôt ez hier . unde dâ
0,20591 dem vater . unde der muoter sâr
0,20592 die âzen es . unde wâren vrô
0,20593 der sterke sîn . si kêrten dô .
0,20594 hin dâ der brûtluft was geleit
0,20595 den si mit grôzer rîchheit
0,20596 begiengen dô die sibene tage
0,20597 dô si nâch rechter wârheit sage
0,20598 vernâmen . unde wart gesaget
0,20599 wie vrech er wære . unde unverzaget
0,20600 wie starc . mit – manlicher kraft
0,20601 si gâben in sîne geselleschaft
0,20602 im drîzic knappen ebenalt
0,20603 unde im ebenalt gestalt
0,20604 daz si die zît mit im vertriben
0,20605 unde sîne gesellen beliben
0,20606 wan mit gelîch behentiu spil
0,20607 machent kurzewîle vile
0,20608 als ez ergie Samsone
0,20609 ire kurzewîle ze lône
0,20610 leite er mit wîslîcher kûre
0,20611 in eine rætischen vûre .
0,20612 er sprach ze in “errâtent ir
0,20613 dise rætischen von mir
0,20614 in sibene tagen . ir habet zehant
0,20615 gewonnen drîzic gewant
0,20616 tuont ir des niht . ze dem selben zile
0,20617 sulet ir mir geben also vile .
0,20618 nû râtent ez ich sage iuch wie
0,20619 ûz dem ezzenten gie
0,20620 daz ezzen . daz der starke man
0,20621 daz sîeze von dem starken kan
0,20622 errâtent ir diz . al vûre wâr
0,20623 habet ir gewonnen drîzic pâr

0,20624 kleider . mit gewinne an mir .
0,20625 diz lobe ich iuch . sô tuont ouch mir”
0,20626 diz wart gelobet ze beider sîte
0,20627 über drîer tage zît .
0,20628 mohten si als diu wârheit jihet
0,20629 die rætischen noch errâten niht .
0,20630 daz was in leit . unde ungemach
0,20631 zehant man si dô kêren sach .
0,20632 ze Samsones wîbe hin
0,20633 unde bâten si des . daz si in
0,20634 ervüere der rætischen underscheit
0,20635 vile rîchiu kleinoede gemeit
0,20636 gehiezen si ir . bî grôzer drô
0,20637 daz si in ervüere dô
0,20638 der rætischen diutunge
0,20639 Samson der vrece – junge
0,20640 kam dô ze sînem wîbe
0,20641 dô bôt si ez sînem lîbe
0,20642 mit zarte grôzer liebe vile
0,20643 biz daz si ez brâhte ûf daz zil
0,20644 mit maniger – trûge . unz an die stunt
0,20645 daz er ir tet die wârheit kunt .
0,20646 dâr nâch dô der sibende tac
0,20647 gein dem zile dô gelac
0,20648 daz si die rætischen wolten
0,20649 entsliezen als si solten
0,20650 si kâmen ze im . als er si sach
0,20651 ire munt sîner vrâge sprach
0,20652 “sage an Samson . waz starker sî
0,20653 danne der lewe . unde sage dâ bî
0,20654 waz honiges sîeze sî gelîch .”
0,20655 dô sprach der degen ellenes rîche
0,20656 “waz hât – unküstigern lîp
0,20657 danne daz unküstige wîp
0,20658 diu rætische wær noch unervarn
0,20659 hætent ir nâch ir niht gearn
0,20660 mit – mîner kalben diu den vunt
0,20661 iu rehte hât gemachet kunt .
0,20662 als ich die wârheit ir – beschiet .”
0,20663 sîn zornic herze im dô geriet
0,20664 daz er von dannen kêrte sâr
0,20665 gein Aschalon . unde sluoc aldâ
0,20666 drîzic heidene der gewant
0,20667 nam er unde brâhte si zehant
0,20668 hin wider dâ der degen balt
0,20669 sîne werschaft mite galt
0,20670 den . die im ez gewonnen an
0,20671 in grôzem zorne schiet er dannen

0,20672 unde vuor aber wider heim
0,20673 sîn muot vile sêre erzürnet schein
0,20674 unde begunde im leiden
0,20675 diu vriuntschaft mit den heidenen
0,20676 in den tagen dô der degen
0,20677 was dâ heime underwegen
0,20678 sîn sweher gap sîn wîp zehant
0,20679 einem andern manne . dô er daz lant
0,20680 unde daz wîp vremeden began
0,20681 dô wart der ellenthafte man
0,20682 verswigen umbe die geschiht
0,20683 er wisse es vile wênic iht
0,20684 wande er nie niht dâ von vernam
0,20685 ê daz er hin wider kam .
0,20686 unde nâch gewoneheit wolte
0,20687 ligen als er solte
0,20688 bî sînem wîbe . dô sprach
0,20689 ire vater ze im . dô daz geschach
0,20690 “lâ diz abe . ez mac niht sîn
0,20691 ich hân gegeben die tohter mîn
0,20692 einem andern manne . dô daz von dir
0,20693 wart geseit mit wârheit mir
0,20694 dû woltest niemer wider komen .
0,20695 hân ich dir dise nû genomen .
0,20696 sô hân ich eine noch dâ bî
0,20697 diu ist vile schoener danne si sî
0,20698 die gibe ich dir vûre jene . daz dû
0,20699 si lâzest – guotlîche nû
0,20700 wan ich bînamen des hâte wân
0,20701 daz dû hætest si verlân
0,20702 mîn tohter jene . durch daz
0,20703 dû ir trüegest grôzen haz .”
0,20704 Samson der ellenthafte man
0,20705 sô sêre zürnen dô began
0,20706 daz er vile unsite pflac
0,20707 er sprach “vûre hiute disen tac
0,20708 sol Philistim gescheiden sîn
0,20709 gar von der vriuntschefte mîn
0,20710 sît mir ist übel hier geschehen
0,20711 sô sulen si sich von mir versehen
0,20712 übels bî den zîten mîn
0,20713 ich wile in unschuldic sîn
0,20714 wande ez an mir begonnen ist”
0,20715 diz was in des zîtes vrist
0,20716 sô man snîden sol daz korn .
0,20717 Samson der degen wolegeboren
0,20718 driu hundert vühse gevie
0,20719 unde als er iegelîchen lie

0,20720 der ellenthafte wîgant
0,20721 dem vuhse an den zagel bant
0,20722 eine vackel . diu bran
0,20723 unde lie si zerloufen danne
0,20724 in diu korn . her . unde hin
0,20725 als si zerloufen kâmen dâr in
0,20726 sô bran daz korn gar . wan ez was
0,20727 dürre . herte . unde niht gras .
0,20728 deweder korn . boum . noch reben
0,20729 swaz erde wuocher solte geben .
0,20730 wan daz allez gar verbran
0,20731 dô daz korn brinnen began
0,20732 dô muoste ez allez brinnen
0,20733 ze brinnende beginnen .
0,20734 dô die – lantliute alsoliches schaden
0,20735 von im wurden überladen
0,20736 si begunden grôzen zwîvel hân
0,20737 wer ez möhte hân getân
0,20738 unz in diu wârheit wart gesaget
0,20739 daz der degen unverzaget
0,20740 der ellenthafte Samson
0,20741 in allen hâte alsolichen lôn
0,20742 getân . durch soliche smâchheit
0,20743 daz sîn wîp im was verseit
0,20744 unde alse smæhelîche genomen
0,20745 daz möhte in wole ze schaden komen
0,20746 noch vûrebaz danne ez wære geschehen
0,20747 si begunden alle jehen
0,20748 si solten rechen diz mein
0,20749 zehant wurden si des enein
0,20750 daz si durch des zornes pîn
0,20751 verdarben sâr den sweher sîn
0,20752 durch sîn unvuoge daz geschach
0,20753 zehant man in verderben sach
0,20754 an guote . unde an lîbe
0,20755 an kinden . unde an wîbe .
0,20756 diu muosten rûmen daz lant
0,20757 unde wart zerstoeret . unde verbrant
0,20758 sîn sweher durch den unvuoc
0,20759 den er gein in mit schulden truoc
0,20760 diu mære entbuten ez im zehant
0,20761 dô sprach der stolze wîgant
0,20762 “swie wole si haben errochen mich
0,20763 sô muoz doch gein in mîn gerich .
0,20764 iemer mêre stæte sîn
0,20765 ich riche an in den anden mîn
0,20766 unde daz mir dâ geschehen ist”
0,20767 in disen zîten unde in der vrist

0,20768 sluoc er ir vile . mêr . unde vile
0,20769 er brâhte si in kurzem zile
0,20770 in soliche vorhte grôz . daz sie
0,20771 von im geruoweten nie
0,20772 wan mit vorhtelîcher nôt
0,20773 als in diu vorhte sîn gebôt
0,20774 dâr engegene si muosten vorhte hân
0,20775 ein luoc was genant Etan
0,20776 dâr in zôch er sich dô zehant
0,20777 unde wuoste dâr ûz . ire liute . ire lant
0,20778 mit sîner manlîcher kraft
0,20779 muote er sô vile die heidenschaft
0,20780 daz si mit vorhte entwichen im
0,20781 nû besamenete sich Philistim
0,20782 mit grôzer kraft . unde vuoren sâr
0,20783 in daz lant . – Juda
0,20784 unde herbergereten nâhe bî
0,20785 einer veste diu hiez Lesbi
0,20786 dâ si ein krefterîchez her
0,20787 hâten mit werlîcher wer .
0,20788 die von Juda sprâchen dô
0,20789 ze den heiden Philistim alsô
0,20790 “wes zîhent ir üns . unde waz hân wir
0,20791 gein iu missetân . daz ir .
0,20792 alse vîantlîche sît
0,20793 ûf üns gevarn an dirre zît
0,20794 nû sîn wir iuwer knehte doch
0,20795 unde dienen iuch mit willen noch
0,20796 unde haben niht dâr abe genomen”
0,20797 die heidene sprâchen “wir sîn komen .
0,20798 daz ir des balde gâhet
0,20799 unde üns Samsonen vâhet
0,20800 wan er iuch missetriuwet niht
0,20801 nû vâhet in . swie daz geschihet
0,20802 daz ir iuch underwintet
0,20803 sîn . unde ir in gebindet
0,20804 unde er üns danne gegeben wirdet
0,20805 ünser zorn iuch gar verbiret
0,20806 unde tuon iuch iemer deste baz
0,20807 ob ir üns gevüegent . daz
0,20808 er üns gevangen wirdet gegeben
0,20809 geschihet des niht . ir müezent leben
0,20810 iemer mêr mit arbeit
0,20811 diu muoz – iuch sîn von uns bereit
0,20812 daz sulet ir nemen in iuvern muot
0,20813 wan swaz er üns ze leide tuot
0,20814 daz gêt über iuch . daz ist ünser muot
0,20815 ob ir niht ünsern willen tuot”

0,20816 von Juda kêrten dô von dannen
0,20817 ze Samsone driu tûsent manne
0,20818 unde sprâchen alse ze im
0,20819 “ûns wellent die heiden Philistim
0,20820 zerstoeren gar . ob wir dich in
0,20821 antwürten niht gevangen hin
0,20822 wir müezen gar pfant sîn . swaz dû
0,20823 in leides tuost . unde schaden nû
0,20824 dâ von solt dû ûns lêre geben
0,20825 wie wir in disen dingen leben
0,20826 sô daz wir iht verderben .”
0,20827 “daz hilfe ich gerne werben”
0,20828 sprach Samson . “unde iuch niht
0,20829 leides iht . durch mich – geschihet .
0,20830 wellt ir swern des . daz ir
0,20831 niht schadent an dem lîbe mir
0,20832 alsô daz ir iht toetent mich
0,20833 noch verderbent . sô wile ich
0,20834 antwürten mich in iuwer hant
0,20835 unde ir antwürtent mich zehant
0,20836 den heidenen . an den stunten
0,20837 an zwei starkiu seil gebunden
0,20838 diu starc . unde niuwe sîn .
0,20839 von starken strangen henfîn
0,20840 unde swaz got welle daz geschehe
0,20841 sô man mich in gegeben sehe
0,20842 daz ir von in âne leit
0,20843 belîbet . unde âne arbeit .”
0,20844 des râtes wart ire herze vrô
0,20845 Samson antwürte sich in dô
0,20846 gevangen . si vuorten in
0,20847 gebunden . zuo den vîanden hin
0,20848 dâ si lâgen . mit grôzer kraft
0,20849 dô riefen si der heidenschaft
0,20850 daz si vile balde kæmen
0,20851 unde in gevangen næmen
0,20852 des vrôuweten sich der heidene schar
0,20853 si liefen algelîche dar
0,20854 als si in wolten vâhen
0,20855 dô si begunden nâhen
0,20856 got tet im grôze helfe erkant
0,20857 ze stücken brach er sîniu bant
0,20858 reht . als ein bloedez durre strô
0,20859 nû gestuont er alsô
0,20860 daz er dâ gein der heidene her
0,20861 truoc decheiner slahte wer
0,20862 deweder jene . dise . noch die .
0,20863 dô vant er ûf dem velde hier

0,20864 ligente eines esels kinnebein
0,20865 daz im gevüeger groeze schein
0,20866 unde dranc mit werlîcher kraft
0,20867 dâ mite ûf die vrenchen heidenschaft .
0,20868 unde sluoc in mit strîte sâr
0,20869 tûsent man ze tôde dâ
0,20870 daz si dâ vore im lâgen tôt
0,20871 als diu gotes kraft gebôt
0,20872 die andern dô entrunden danne
0,20873 dem krefterîchen starken manne .
0,20874 dô Samson mit manheit
0,20875 alse hôhen sige erstreit
0,20876 ein niuwez getihter er sanc
0,20877 wan im sô sæliclîche gelanc
0,20878 dâ mit er gufte sîn getât
0,20879 durch gûftiges herzen rât
0,20880 tet er in sînem sange erkant
0,20881 den prîs . den dâ erstreit sîn hant
0,20882 mit der gotes helfe kraft
0,20883 diu in dô machete sigehaft
0,20884 an den vervluhten heidenen
0,20885 dô er sus was gescheiden
0,20886 von dem selben strîte danne
0,20887 von grôzer müede in began
0,20888 sô sêr dûrsten . von durstes nôt
0,20889 daz er nâhe was von durste tôt
0,20890 unde verdorben gar . got rief er an
0,20891 “got hêre” sprach der vrenchen man
0,20892 “ein dürrer durst der brennet mich
0,20893 nû tuo mir helfe schîn . daz ich .
0,20894 niht âne wer verderbe
0,20895 unde hier von durste sterbe
0,20896 unde daz ich niht werde gesant
0,20897 in dirre unbesniten hant
0,20898 alsô daz alhier mîn leben
0,20899 in ire gewalt iht werde gegeben .”
0,20900 got durch Samsones gebet
0,20901 ein wunderlîchez wunder tet
0,20902 dâ er im erzeigte mite .
0,20903 sîne wunderlîche site
0,20904 wan got der gewære
0,20905 ist gar ein wunderære
0,20906 als er aldâ lie werden schîn
0,20907 an Samsone dem kempfen sîn
0,20908 ein brunne ûz dem grôzesten zane
0,20909 von des esels kinne ran .
0,20910 der in dem durren beine entspranc
0,20911 Samson aldâ des brunnen transc

0,20912 biz daz der ellenthafte man
0,20913 al sîne krefte wider gewan
0,20914 unde er vile wole gelabet wart
0,20915 dô im dâ ûf der selben vart
0,20916 gelanc sô sæliclîche
0,20917 der edele muotes rîche
0,20918 schiet von dannen . er kêrte sâr
0,20919 in eine stat . diu hiez Gaza
0,20920 diu von dannen was gelegen
0,20921 dâ gesach der starke deggen
0,20922 ein hübeschærinne ein schoene wîp
0,20923 diu hâte ein minniclîchen lîp
0,20924 zuo der gie er . unde lac bî ir
0,20925 durch sînes muotwillen gire
0,20926 als in sîn irricheit lêrte
0,20927 nû . dô er zuoze ir kerte
0,20928 unde daz den heidenen wart erkant
0,20929 – – si versatzten im zehant
0,20930 diu bürge tor mit starker wer
0,20931 der pflac heiden ein michel her
0,20932 die in solten slahen gar
0,20933 swenne er zuoze in kæme dar
0,20934 unde er ûz hin wolte gân
0,20935 sô solte er daz leben lân
0,20936 dô wart mit wîsen sinnen
0,20937 Samson der deggen innen .
0,20938 daz im diu lâge was geleit
0,20939 mit vrecher mannes manheit
0,20940 brach er die lâge . als daz geschach
0,20941 diu tor er ûz ire slozzen brach
0,20942 unde truoc daz êrîne werc
0,20943 zwei tor hin ûf den hôhesten berc
0,20944 ze ietweder hant . ietweder tor
0,20945 truoc er sô lîhticlîche enbore
0,20946 als ez wæren zwei liehtiu bret
0,20947 dâr nâch dô er daz getet
0,20948 ze – Oret er dô kam
0,20949 ein wîp er dâ ze wîbe nam
0,20950 diu was geheizen Dalida
0,20951 bî der liez er sich nider dâ
0,20952 wan er von herzen minnete si .
0,20953 dô er alsus ir wonete bî
0,20954 nâch vrâgente im kâmen dar
0,20955 von den heidenen vûnf schar
0,20956 unde buten ir mit gedinge
0,20957 einlif hundert pfenninge
0,20958 ze miete unde ze lône
0,20959 daz si von Samsone

0,20960 ervüere diu rehtiu mære
0,20961 wâ von sîn sterke wære .
0,20962 unde mit welichen dingen
0,20963 si in mohten betwingen
0,20964 unde gevangen vüeren hin
0,20965 von guote grôzen gewin
0,20966 – gehiezen si ir noch vürebaz
0,20967 daz si mit listen vuogte . daz
0,20968 si möhten in gevâhen
0,20969 des solte si lôn entvâhen
0,20970 Dalida begunde ire man
0,20971 vlîzicliche ligen an
0,20972 ze allen zîten vrâgente .
0,20973 listente unde bâgente
0,20974 gelîchesente ze aller stunte
0,20975 daz er ir rehte tete kunt
0,20976 wâ von er hæte solich kraft
0,20977 unde weliche kraft im wære an behaft
0,20978 durch sînen spot seite er ir dô
0,20979 diu mære von sîner kraft alsô
0,20980 er sprach “wær ich gebunden
0,20981 unde gebunden vunden
0,20982 mit siben seilen æderîn
0,20983 diu vrech unde niuwe solten sîn
0,20984 sô wær ich sô betwungen gar
0,20985 daz ich an kreften würde bar
0,20986 unde würde werlôs als ein man
0,20987 der mîne sterke nie gewan
0,20988 durch daz wile ich ez versuochen lân .”
0,20989 dô disiu rede was getân
0,20990 diu vürewitze Dalida
0,20991 hiez siben seil gewinnen sâr
0,20992 von âdern starc . vrisch . unde guot .
0,20993 dâ mite der degen vrechgemuot
0,20994 gebunden wart aldâr er lac
0,20995 unde eines slâfes entpflac
0,20996 wan er hâte sich geleit
0,20997 müede ein teil von irricheit
0,20998 die heiden Philistei
0,20999 hâten sich geleit dâ bî
0,21000 wartende sîn . dô rief iesâ
0,21001 mit valschen triuwen Dalila
0,21002 “wole ûf Samson hüete dîn
0,21003 dir wellent die heidene schade sîn
0,21004 die sint ûf dich komen her”
0,21005 ûf spranc er sâr . zehant als er
0,21006 ire ruof erhôrte . daz geschach
0,21007 diu siben seil er gar zerbrach .

0,21008 als ob si wæren durrez strô
0,21009 die heidene im entrunden dô
0,21010 von grôzen vorhten . aber sâr
0,21011 versuochte vürebaz Dalila
0,21012 alsô daz si den wîgant
0,21013 aber an siben seil gebant
0,21014 diu er zerbrach als dâ vore êr
0,21015 noch betrouc si in vürebaz mêr
0,21016 mit sînem willen al vüre wâr
0,21017 si bant im slâfende daz hâr
0,21018 an eine sûl . als er entslief
0,21019 alzehant si ime rief
0,21020 als êr . der heidene vorhte in twanc
0,21021 daz er ûz dem slâfe spranc
0,21022 unde zuhte ûz der erde danne
0,21023 den pfâl . dâ er gebunden an .
0,21024 was . durch versuchenes kûndicheit
0,21025 als ich iuch nû hân vore geseit .
0,21026 dô sich Dalila began
0,21027 versinnen daz si trouc ire man .
0,21028 mit valscheit in ungüete
0,21029 verkêrte si ire gemüete
0,21030 unde begie der valscheit zeichen
0,21031 nû began si smeichen .
0,21032 nû zarten . nû weinen
0,21033 nû trûricheit erscheinen
0,21034 nû mit guotlîchen siten
0,21035 guotlîche drôuwen . guotlîche biten
0,21036 nû vriuntschaft im verzîhen
0,21037 nû suone wider lîhen
0,21038 nû triuten . nû minnen
0,21039 mit valschen trügesinnen
0,21040 brâhte ez ire valscher lîp dâr an
0,21041 daz ir der krefterîche man
0,21042 mit kraft niht mohte widerstân .
0,21043 er muoste si gar wizzen lân
0,21044 swes si in vrâgete . daz geschach
0,21045 Samson ze sînem wîbe sprach
0,21046 “nû wile ich dir die wârheit sagen
0,21047 sît mîner geburt in mînen tagen
0,21048 ist mit gotes heilicheit
0,21049 diu gotes wîhe an mich geleit
0,21050 unde sol niht ûf mîn houbet komen
0,21051 dâ von mîn hâr mir werde benomen
0,21052 wan würde mir daz abe geschoren
0,21053 sô wære mîn sterke gar verloren
0,21054 unde wære al diu kraft dâ hin
0,21055 von der ich sus gesterket bin .”

0,21056 alse dô Dalila vernam
0,21057 diu mære . unde den ze ende kam
0,21058 wâ von der degen ellenthaft
0,21059 Samson hâte soliche kraft
0,21060 si tet den heidenen sâr zehant
0,21061 mit ire boteschaft erkant
0,21062 si hâte ervarn ire willen gar
0,21063 daz si kæmen . unde ir dar
0,21064 bræhten die miete
0,21065 umbe die si in verriete
0,21066 des starken Samsones lîp
0,21067 die miete die daz valsche wîp
0,21068 vorderte . die brâhten sie
0,21069 unde wâren verstolene nâhe hier
0,21070 mit grôzer kraft als si geriet
0,21071 dô diu heidenischiu diet
0,21072 was komen . unde gewerte
0,21073 der miete . der si gerte
0,21074 si schuof mit trûgenissen grôz
0,21075 daz sich Samson ûf ire schôz .
0,21076 leite . unde entslief . dô nam iesâ
0,21077 diu ungetriuwe – Dalila .
0,21078 ein schære . unde beschar
0,21079 Samsone sîn houbet gar
0,21080 unde stiez in smæheliche von ir .
0,21081 mit vîandes vîantlîcher gire
0,21082 liefen dô die heidene hin
0,21083 ûf in . unde viengen in
0,21084 wande er was worden âne kraft
0,21085 den jungen degen ellenthaft
0,21086 blanden die heidene sâr zehant
0,21087 als üns diu wârheit tuot erkant .
0,21088 dô Samson erblendet wart
0,21089 in nâmen an der selben vart
0,21090 die heidene . unde vuorten in
0,21091 in dem lande her . unde hin
0,21092 unde muoten in mit spotte vile
0,21093 in der selben tage zile
0,21094 vuorten si in gein Gaza
0,21095 unde twungen in . daz er aldâ
0,21096 muoste dô belîben
0,21097 unde eine kûrne trîben
0,21098 unde in maln gar ire korn
0,21099 dem jungen helde wolegeboren .
0,21100 leiten si zuo starkiu wîp
0,21101 die wole gewahsenen lîp
0,21102 hâten alse genuoge sint
0,21103 daz si bî im starkiu kint

0,21104 truogen . unde gewonnen . dô
 0,21105 nû diz geschehen was alsô
 0,21106 Samsone . dô begunden
 0,21107 in disen selben stunden
 0,21108 wider wahsen sîniu hâr
 0,21109 unde sîniu êrriu kraft alwâr
 0,21110 gewan er wider al sîn kraft
 0,21111 nû samenete sich diu heidenschaft
 0,21112 von allem dem lande wîten .
 0,21113 dar ze ire hôhesten hôchgezîten
 0,21114 in der si nâch ire ê gebote
 0,21115 soleten opfern ire gote
 0,21116 der was geheizen Dagon
 0,21117 nû wart der starke Samson
 0,21118 ouch durch den spot besant dâ hin
 0,21119 daz er spilete dâ vore in
 0,21120 unde daz si spotten sîn dâ mite
 0,21121 durch alsô spotlîche site
 0,21122 wart Samson aldar besant
 0,21123 daz er dâ mite würde geschant .
 0,21124 nû samenete sich diu heidenschaft
 0,21125 unde ire hêrschaft mit al ire kraft
 0,21126 in daz betehûs dâ sie
 0,21127 ire opfer wolten bringen hier
 0,21128 dem valschen Dagone
 0,21129 ze lobe . unde ouch ze lône
 0,21130 daz in was âne wer gesant
 0,21131 ire leidester vîant in ire hant .
 0,21132 unde wart Samson ouch brâht aldar .
 0,21133 dâ die heidenischen schar
 0,21134 ire gote ire opfer brâhten
 0,21135 als si ez dô gedâhten
 0,21136 dô was mit grôzer rîchheit
 0,21137 ein rîchelich wirtschaft dâ bereit
 0,21138 ûf einem hôhen palase
 0,21139 dô diu hêrschaft gesezzen was
 0,21140 ze tische als ich gelesen hân
 0,21141 Samson muoste vore in stân
 0,21142 daz ire spotlich ungelimpf
 0,21143 mit im tribe iren schimpf
 0,21144 des mit im dâ vile geschach .
 0,21145 vile bovels man dâ zuo dringen sach .
 0,21146 daz si sînes schimpfes næmen war
 0,21147 nû was daz hûs bewelbet gar
 0,21148 daz ez ûf habete . unde ez beslôz
 0,21149 gewelbet ûf zwô siule grôz
 0,21150 die stuonten nâch einander
 0,21151 dar kam Samson . dô vant er

0,21152 grîfente die siule dâ
0,21153 ze sînem knaben sprach er sâr
0,21154 “gip mir die siule in die hant
0,21155 beide . unde tuo mir si bekant
0,21156 daz ich mich dâr an geleine
0,21157 unz ich geruowe ein kleine .”
0,21158 sîn knabe tet . als er in bat
0,21159 er vuorte in reht unz an die stat
0,21160 dâ er die siule ergreif mit kraft
0,21161 dô sprach der degen ellenthaf
0,21162 “nû wile ich sterben . unde geben
0,21163 durch dise heidene mîn leben
0,21164 daz ouch si mit mir ligen tôt”
0,21165 sîn manlich elln im gebôt
0,21166 daz er die siule gezuhte
0,21167 von stat sô sêre geruhte
0,21168 daz der hôhe palas
0,21169 unde swaz dâr an gezimbers was
0,21170 vile gar zerviel . unde zerbrast .
0,21171 diu mûre . unde des gezimbers last
0,21172 Samsonen sluoc . unde al die schar
0,21173 die die heidene – brâhten dar
0,21174 der . die ze tische sâzen
0,21175 unde die mit vröuweden âzen
0,21176 was driu tûsent . âne die
0,21177 die durch die kurzewîle wâren hier
0,21178 dâ Samson ûf dem palase
0,21179 der heidene spil . unde gampel was .
0,21180 der was sô vile . daz âne zal .
0,21181 belîben muosten überal
0,21182 ungeprüevet . unde ungezalt
0,21183 alsus tôte der degen balt
0,21184 Samson nâch tôde liute mêt
0,21185 danne er hæte ertoetet êr
0,21186 des üns diu schrift urkunde gît
0,21187 dô kâmen an der selben zît
0,21188 sîne vriunde . unde nâmen in dâ
0,21189 unde vuorten in von dannen sâr
0,21190 hin heim dâ er mit rîchheit
0,21191 zuo sînen vordern wart geleit .
0,21192 dô er als ich ez hân gelesen
0,21193 zweinzic jâre was gewesen
0,21194 voget der israhêlischen diet
0,21195 von dirre werelte er hinnen schiet .
0,21196 unde hæte mit werlîchen siten
0,21197 dem liute solichen vride erstriten
0,21198 daz nieman lie decheine vart .
0,21199 der iener im ze muote wart

0,21200 er vuor âne angest swâ sîn sin
0,21201 im geriet ze varnne hin
0,21202 daz si muosten êr bewarn
0,21203 wan nieman getorste varn
0,21204 von der israhêlischen schar
0,21205 âne geleite dar . noch dar .
0,21206 Samson dô der verdarp alsô
0,21207 nâch im was bî den zîten dô
0,21208 in Israhel rihtære niht
0,21209 unde was daz liut gar unberiht
0,21210 unde lebeten swie si wolten
0,21211 anders danne si solten
0,21212 der man tet swaz in dûhte guot .
0,21213 diu irricheit . der – tumben muot
0,21214 verirrt dô der liute vile
0,21215 dâ von in der tage zile .
0,21216 daz liut mit maniger schulde
0,21217 verworhte gotes hulde
0,21218 dâ von dô ein unbilede ergie
0,21219 von dem ich nû wile sprechen hier
0,21220 durch daz dô bî den selben tagen
0,21221 ein ganz geslehte wart erslagen
0,21222 daz künne gar von Benjamîn
0,21223 dâr nâch als ich bewîset bin
0,21224 wile ich iuch rehte sagen wie
0,21225 unde wâ von diz unbilede ergie .
0,31681 als er gebôt durch solichen site
0,31682 daz ime gevestenet würde mite
0,31683 diu wîhe volliclîche
0,31684 dâr zuo krône . unde rîche
0,31685 dâr nâch leite er in wîser kûre
0,31686 in mit gotes lêre vûre
0,31687 daz si an betten einen got
0,31688 unde iemer leisten des gebot
0,31689 unde mêr enheinen
0,31690 an beteten wan den einen
0,31691 unde mit welichen sachen
0,31692 si dem solten machen
0,31693 ein tĒmpel sîner heilicheit
0,31694 dô in wart von im vûre geleit
0,31695 gotes lêre als er si lêrte
0,31696 ir – iegelîcher kêrte
0,31697 von hove hin wider heim zehant
0,31698 von dannen er dar was besant .
0,31699 nû began der selben zît
0,31700 siechen der edel küninc Dâvît
0,31701 wan ime begunde nâhen
0,31702 sîn tôr . unde zuoze im gâhen

0,31703 des er vile gæhest sêre entvant
0,31704 vüre sich besande er sâr zehant
0,31705 Salomonen . unde sprach
0,31706 dô er in vüre sich komen sach
0,31707 “sun . dû solt volliclîche
0,31708 got von himelrîche
0,31709 üeben . unde in hân ze gote
0,31710 unde nâch sînem gebote
0,31711 gotes ê behalten . der urhap
0,31712 got üns mit Moisesse gap
0,31713 die solt dû wole behalten
0,31714 unde mit stæte ir vile gerne walten .
0,31715 sun dâr zuo sî dir bekant
0,31716 unde wis des vile wole gemanet
0,31717 daz mir got diz rîche
0,31718 gehiez – êwiclîche
0,31719 ze gebenne . unde mînen nâchkomen
0,31720 würde ez niemer benomen
0,31721 ob si behielten sîn gebot
0,31722 sît daz mit dem gedinge got
0,31723 die krône üns gegeben hât
0,31724 sô solt dû âne missetât
0,31725 gein im unde âne sünde
0,31726 behalten sîn urkünde
0,31727 unde des mit stætem muote pflegen
0,31728 sich daz dû von sînen wegen
0,31729 gewendest niemer dînen sin
0,31730 dû kêrest dînen muot an in
0,31731 sun dô ich sünden mohte
0,31732 unde der gewalt mir tohte
0,31733 al nâch mînes herzen gire
0,31734 nieman werte sünde mir
0,31735 dô huotte ich mich daz ich nie
0,31736 unrehte sünde gein gote begie
0,31737 wan an einem wîbe
0,31738 an Uriases lîbe
0,31739 dem ich mit sünden sîn wîp
0,31740 nam . unde hiez nemen sîn lîp
0,31741 dâr umbe got sînen gerich
0,31742 kêrte billiche an mich
0,31743 sun ich wile ouch klagen dir
0,31744 unde wile dich biten daz dû mir
0,31745 – rechest den grôzen unvuoc
0,31746 an Joabe . daz er sluoc
0,31747 in mînem geleite Abnêren .
0,31748 den vile edeln vürsten hêren .
0,31749 an dem er mîn geleite brach
0,31750 dô man in von mir scheiden sach

0,31751 mit suone in vriundes sicherheit
0,31752 sun ouch lâ dir wesen leit
0,31753 daz Amasa lac von im tô
0,31754 dem ich ouch mîn geleite bôt
0,31755 daz rich ouch an im durch mich
0,31756 wan er sînen balderich
0,31757 begôz mit ire bluote .
0,31758 habe ouch in dînem muote
0,31759 daz dû rechest mir dâ bî
0,31760 daz mich der valsche Semei
0,31761 alse lasterliche beschalt
0,31762 dô mich Absalones gewalt
0,31763 vertreip . unde ich im entran
0,31764 dô schalt mich der selbe man
0,31765 vile lasterliche daz vernim
0,31766 daz solt dû rechen sô an im
0,31767 daz ich wole sicherliche
0,31768 var in mînem rîche
0,31769 vile lieber sun unde bewar
0,31770 daz er iht geruowet var
0,31771 hin zuo der helle âne gerich
0,31772 daz er beschalt sô sêre mich
0,31773 âne schulde . sun daz rich
0,31774 an sînem lîbe sun durch mich
0,31775 unde behüete iht ie dâr under gotes
0,31776 unde der ê . unde gotes gebotes .”
0,31777 dâr nâch niht über lange zît
0,31778 slief der edel küninc Dâvît
0,31779 sîner vordern slâf . sô daz starp .
0,31780 unde im des lîbes leben verdarp
0,31781 von dem sîn heilic leben schiet
0,31782 dô er gepflac der gotes diet .
0,31783 in küninges namen vierzic jâr
0,31784 sibenzic was er alt vûre wâr
0,31785 Dâvît in den tagen dô
0,31786 unde hâte sîne zît alsô
0,31787 gelebet . daz er nâch gotes gebote
0,31788 nie gesündete gein gote
0,31789 er en wandelte ez nâch schulden
0,31790 den süezen gotes hulden .
0,31791 sô daz im got die schulde
0,31792 liez . unde gap im sîne hulde
0,31793 mit gotelicher güete
0,31794 sîn sæliclich gemüete
0,31795 daz was gein gote alse reht
0,31796 alsô verrihtet . unde ebensleht
0,31797 daz got selbe von im sprach
0,31798 dô er sîn reinez herze ersach

0,31799 alsô reine . unde alse reht
0,31800 “ich hân Dâviden mînen kneht
0,31801 nâch mînem herzen vunden
0,31802 der durch mich ze allen stunten
0,31803 allen mînen willen tuot
0,31804 des weiz ich in gein mir gemuot”
0,31805 diz wort gedienete werde
0,31806 Dâvît hier ûf der erde
0,31807 dâ von er wûnnicliche
0,31808 treit ze himelriche
0,31809 die iemer wernte krône
0,31810 die im got ze lône
0,31811 in sînem rîche hât bereit
0,31812 mit êwiclîcher stæticheit
0,31813 dâ im daz iemer werntez leben
0,31814 mit lebender vrôuwede ist gegeben
0,31815 nâch werken ze lône
0,31816 von dem künînge Salomone
0,31817 wart er ze Jerusalêm geleit
0,31818 mit küninclîcher werdicheit .
0,31819 unde wart dâr nâch sît langiu zil
0,31820 geklaget von – den sînen vile
0,31821 die sich jâmers kunden wern
0,31822 dô si solten sîn entbern
0,31823 unde sîniu künincriche
0,31824 er wart sô richeliche
0,31825 begraben . daz üns Josephus
0,31826 mit rehter wârheit schrîbet sus
0,31827 daz ahte hörde richheit
0,31828 zuoze im wurden geleit
0,31829 in ahte vesten sarken
0,31830 vesten . unde starken
0,31831 mit zoubelîcher meisterschaft
0,31832 unde mit verborgener liste kraft
0,31833 daz si nieman vûnte
0,31834 unde nieman vinden kunde .
0,31835 doch vant ir einen dâr nâch sît
0,31836 über maniger jâre zît
0,31837 Johannes Ircanus
0,31838 als üns schrîbet Josephus
0,31839 unde überwant mitall die nôt
0,31840 die im mit urluige bôt
0,31841 unde mit vîantlîcher kraft
0,31842 diu verworhtiu heidenschaft
0,31843 als si wâren ie gewon
0,31844 unde stifte doch dâ von
0,31845 ze Jerusalêm den spitâl
0,31846 dâ manic nôtdürftic mâl

0,31847 durch got almuosenes vile geschihet
 0,31848 als man tagelîche mit wârheit sihet
 0,31849 unde iemer mêre sehen mac
 0,31850 wêrlîche unz an den jungesten tac
 0,31851 biz daz diu werelt mac gestân
 0,31852 genuoger jehe . unde wænlich wân
 0,31853 jihet . daz hier ein werelt gê abe
 0,31854 mit zal . unde al hier ende habe
 0,31855 des jich – der ez welle jehen
 0,31856 ich wile mit wârheit mich versehen
 0,31857 daz ein schidunge wære getân
 0,31858 als ich si unterscheiden hân
 0,31859 dâr nâch der selben jâren zît
 0,31860 dô der edel küninc Dâvît
 0,31861 erstarp . dô wart diu krône
 0,31862 sînem sune Salomone
 0,31863 der von im was geboren
 0,31864 dô der ze küninge was erkoren
 0,31865 unde almehticlîche küninc was
 0,31866 – – – Dâvîdes sun Adonias
 0,31867 von dem ich hân gesprochen êr
 0,31868 gie eines tages zuo Bersabê
 0,31869 Salomonis muoter dô
 0,31870 diu was sîner kunft unvrô
 0,31871 unde erschrac dô er vûre si kam
 0,31872 wan er was ir mit nîde gram
 0,31873 si erschrac dô si in sach
 0,31874 erkomenlîche si dô sprach
 0,31875 “kumest dû mit vride her . oder wie .”
 0,31876 “jâ . ich bin mit vride hier”
 0,31877 sprach er . “unde wolte biten dich
 0,31878 daz dû betest vûre mich
 0,31879 den küninc . daz er ze wîbe mir
 0,31880 gebe Abisac . daz ist mîn gire
 0,31881 mînes vaters vriuntîn .” dô tet
 0,31882 Bersabê nâch sîner bete
 0,31883 unde gie dâ si den küninc vant
 0,31884 der saz . unde als – im wart bekant .
 0,31885 daz sîn muoter vûre in gie
 0,31886 sîner zuht er si geniezen lie
 0,31887 unde stuont schône ûf von sîner stat
 0,31888 nâch gruoze er si sitzen bat
 0,31889 unde êrte an ir mit hôher zuht
 0,31890 daz er ire kint was unde ire vruht .
 0,31891 er vrâgete si der mære
 0,31892 durch waz si komen wære .
 0,31893 si sprach . “ich bin komen her
 0,31894 daz dû – tuost des ich nû ger .”

0,31895 er sprach "liebiu muoter mîn
 0,31896 sage mir die ger . diu gâbe ist dîn"
 0,31897 si sprach "dâ wile ich biten dich
 0,31898 daz dû ze wîbe gebest durch mich
 0,31899 âne zornlîchen bâc
 0,31900 Adoniase Abisac
 0,31901 daz dunket mich ein werder lôn ."
 0,31902 "muoter" sprach dô Salomon
 0,31903 disiu bete ist gar ein wiht
 0,31904 wâr umbe bâte dû mich niht
 0,31905 mîner krône . die hæte ich
 0,31906 gelân . unde gegeben durch dich .
 0,31907 nû – weiz ich rehte wole den list
 0,31908 wie disiu bete komen ist .
 0,31909 vüre wâr bînamen Joabes rât
 0,31910 gevrûmet dise bete hât
 0,31911 dâr ûf . unde hæte ich ez getân
 0,31912 daz man gesprochen muoste hân
 0,31913 "Salomon ist ungemuot
 0,31914 dem er nû gelîche tuot .
 0,31915 daz er durch iemannes rât
 0,31916 sînes vaters vriuntinne hât
 0,31917 sînem bruodere gegeben
 0,31918 daz wider gote ein süntelich leben .
 0,31919 ist . unde in Israhel geschehen
 0,31920 daz er als unreht ist – ersehen
 0,31921 des sol er billîche
 0,31922 verliesen sîn rîche
 0,31923 wande er ez mit wârheit âne wân
 0,31924 niht wan durch vorhte hât getân ."
 0,31925 doch ist ez niemanne rehte kunt
 0,31926 ob si ie ze keiner stunte
 0,31927 bî mînes vaters lîbe
 0,31928 von im – ie wart ze wîbe
 0,31929 wan daz in wânes zwîvel stât
 0,31930 sô wære ez gar ein missetât
 0,31931 diu mir gein gote sêre
 0,31932 krankte lîp . unde êre
 0,31933 dâ von ez sol sîn vermiten .
 0,31934 daz er es getorste ie gebiten
 0,31935 als daz got lebet des muoz er geben
 0,31936 noch hiute beidiu lîp . unde sîn leben .
 0,31937 wan sînes unrehten herzen rât
 0,31938 verteilet im sîn leben hât
 0,31939 dâr an er mich hât verloren .
 0,31940 der edel küninc hôchgeboren
 0,31941 in disem zorne sande er hin
 0,31942 vile balde . unde hiez slahen in

0,31943 einen helt der hiez Banaias
0,31944 der tet als er geheizen was
0,31945 unde im Salomon gebôt
0,31946 von im lac Adonias tôt .
0,31947 der in – umbe die schulde sluoc .
0,31948 daz er der bete ie gewuoc .
0,31949 diu dem künige was sô leit
0,31950 mit küninclîcher werdicheit
0,31951 hiez in der küninc rîche
0,31952 begraben hêrlîche .
0,31953 dô Joap daz hôrte sagen
0,31954 daz Adonias was erslagen
0,31955 er vorhte ouch des küniges zorn
0,31956 unde sîn leben hân verloren
0,31957 daz sîn schulde im verworhte
0,31958 in twanc diu grôze vorhte
0,31959 daz er durch genesenes gelt
0,31960 vlôch in daz heilige gezelt
0,31961 unde vienc in grôzer swære
0,31962 zuoze im den altære
0,31963 unde wânte mit den listen
0,31964 sîn leben vürebaz vristen
0,31965 daz er wiste hân verloren
0,31966 dem edeln künige wolegeboren
0,31967 wart dô getân daz mære kunt
0,31968 dô sande nâch im sâr zestunt
0,31969 der küninc daz er kæme
0,31970 vüre in . unde dâ vernæme
0,31971 wes er in an spræche
0,31972 unde waz er an im ræche
0,31973 möhte er mit rehte sich gern
0,31974 unde vore im sînen tôt erwern
0,31975 daz er kæme unde tete daz .
0,31976 dô vorhte er Salomonis haz
0,31977 sô sêre umbe sîn geschiht
0,31978 daz er wolte dannen niht
0,31979 diz wart aber dem künige erkant
0,31980 dô sande er dar sâr zehant
0,31981 unde hiez in ze tôde sâr
0,31982 slahen bî dem altær dâ .
0,31983 dô daz alsô geschehen was .
0,31984 unde Joap . unde Adonias
0,31985 genâmen ire gedieneten lôn
0,31986 dô besande Salomon
0,31987 den êwarten Abiathar
0,31988 als er was komen vüre in dar
0,31989 er sprach “dir sî vüre wâr geseit
0,31990 mit endelîcher – wârheit

0,31991 daz dû des tôdes muostes sîn
 0,31992 wan daz dû mit dem vater mîn
 0,31993 hâst mit arbeitlîchen siten
 0,31994 sô manige arbeit erliten
 0,31995 dû trûege mit im die arke vore
 0,31996 unde gotes heilicheit enbore
 0,31997 dô Absalon in umbe treip
 0,31998 wan dîn triuwe dô beleip
 0,31999 stæte an im . des solt dû
 0,32000 geniezen umbe daz leben nû
 0,32001 daz dû verloren muosest hân
 0,32002 ob dû es niht hætest getân .
 0,32003 nû var enwec . wis hier niht mêr
 0,32004 unde wis in Anatolê .
 0,32005 dû solt êwarten ambaht lân
 0,32006 daz Sadoch sol vûre dich hân”
 0,32007 alsus wart im genomen abe
 0,32008 êwarten reht . wurde . unde habe .
 0,32009 diu dâr an mit grôzer rîchheit lac
 0,32010 deme . der dâ êwarten ambahtes pflac
 0,32011 unde wurden dâ biz ûf ein ort
 0,32012 bewæret Samueles wort
 0,32013 diu er in sîner kintheit
 0,32014 Eli dâ vore hâte geseit .
 0,32015 nâch gotes wârheit in Silo
 0,32016 dô er im sagete alsô
 0,32017 er muoste êwarten ambaht lân
 0,32018 unde daz solte nâch im hân
 0,32019 sîn vîant durch die schulde hôch
 0,32020 daz er sîne süne niht zôch
 0,32021 die mit maniger ungenuht
 0,32022 unrehtes pflâgen . mit unzuht
 0,32023 daz arnete sîn geslehte dô
 0,32024 mit der unwirde alsô
 0,32025 daz ez die werdicheit verlôs
 0,32026 an die si got von êrst erkôs
 0,32027 daz mêr danne in die vierden art
 0,32028 verworht mit houbetschulden wart .
 0,32029 dô Joap verderbet was
 0,32030 unde dâr zuo Adonias
 0,32031 lac umbe sîne schulde tôt
 0,32032 alse Salomon gebôt
 0,32033 unde sîn vîantlîchiu ande .
 0,32034 nâch Semei er sande
 0,32035 des itewîze manicvalt
 0,32036 den küninc Dâvîden êr beschalt
 0,32037 dô in mit her muote Absalon .
 0,32038 ze im sprach der küninc Salomon

0,32039 dô er mit vorhten vüre in gie
 0,32040 “zimber ein hûs . unde wis hier
 0,32041 in dînem hûse in dirre stat
 0,32042 dâ dîn gemach dir wirdet gesazt
 0,32043 unde hûete” sprach Salomon
 0,32044 “daz dû iemer komest über Cedron .
 0,32045 oder bînamen dû muost geben
 0,32046 âne wer . lîp . unde leben
 0,32047 des kanst dû niemer werden vrî”
 0,32048 “hêrre” sprach dô Semei
 0,32049 “dû hâst gein mir gesprochen wole .
 0,32050 der rede ich gerne folgen sol
 0,32051 willicliche unde âne vâ”
 0,32052 alsus beleip er zwei jâr
 0,32053 daz er ûzwentic der stat
 0,32054 daz selbe zil nie vuo”z getrat
 0,32055 doch brach er ez . des muoste er geben
 0,32056 umbe die schulde dô sîn leben
 0,32057 unde umbe der alten schulde haz
 0,32058 daz er sîn selbes sô vergaz
 0,32059 daz er den gotes degen balt
 0,32060 Dâviden alse sêre beschalt .
 0,32061 hier bî tuot ûns diu schrift erkant
 0,32062 wie die wâren genant
 0,32063 die Salomon hâte gesazt
 0,32064 an sînes gewaltes hôheste stat
 0,32065 die mit ire pflege nâmen war
 0,32066 sîner lande . sîn gewaltes gar
 0,32067 doch als er – in die pflege beschiet
 0,32068 unde mit wîsheit unterschiet
 0,32069 der nennet diu schrift niht wan drî .
 0,32070 swaz ir mit zal halt mêre sî .
 0,32071 der hât diu schrift hier niht genant
 0,32072 wan daz si tuot die drî erkant .
 0,32073 der degen Bananias
 0,32074 sîn hôheste herzoge was
 0,32075 unde gewaltic mit kraft
 0,32076 über alle sîne ritterschaft
 0,32077 Sadoches sun sîn schrîbær was
 0,32078 der sîne heimeliche alle las
 0,32079 unde sîniu reht berihte
 0,32080 mit schrift sîn brieve tihte
 0,32081 mit pflege Natanes sun ouch pflac
 0,32082 der . gein den er sich bewac
 0,32083 daz si sînes lîbes solten pflegen
 0,32084 daz was Natanes sun ein degen .
 0,32085 der von iegellichem künne was
 0,32086 vier tûsent als ich hier vore las

0,32087 die des küniges pflâgen
0,32088 unde nâch ire ordene lâgen
0,32089 umbe in ze ringe in alle sîte
0,32090 als ez dâ vore êr schuof Dâvît
0,32091 Salomon der rîche
0,32092 umbemûrte werlîche
0,32093 mit niuwen mûren al die stat
0,32094 er gebôt . hiez . unde bat .
0,32095 daz alte gemiure brechen nider
0,32096 unde aber dâr nâch mûren wider
0,32097 mit vesten türnen hôch erhaben
0,32098 innewentic tiefen wîten graben
0,32099 die die stat umbegiengen
0,32100 unde die veste umbeviengen
0,32101 werlîche als der küninc gebôt
0,32102 vüre vîantlich urluiges nôt
0,32103 der si wart sît vile an geleit
0,32104 in dirre hôhen werdicheit
0,32105 nam er dô sînem lîbe
0,32106 von Egipte im ze wîbe
0,32107 eines küniges tohter sâr zehant
0,32108 der Ptolomeus was genant
0,32109 unde began in sînen tagen
0,32110 gote vile gar wole behagen
0,32111 wan swaz dannoch der gotes kneht
0,32112 tet . daz was guot . unde reht
0,32113 âne daz eine . daz er gote
0,32114 wider gotes ê gebote
0,32115 betete . daz wâren altær die gote
0,32116 wâren wider gotes gebote
0,32117 ze Jerusalêm gemachet dô
0,32118 des wîset üns diu schrift alsô .
0,32119 dô Salomon sus lebete .
0,32120 in solichem vride swebete
0,32121 daz im leides niht geschach
0,32122 wan daz – im êre unde gemach
0,32123 wuohs mit grôzer rîchheit kraft
0,32124 er gedâhte in sîner hêrschaft
0,32125 daz er dô muoste bringen
0,32126 mit heiliclîchen dingen
0,32127 sîn opfer gote in Gabaon
0,32128 dô bereitte Salomon
0,32129 sich ze dem gotes opfer sâr
0,32130 gein Gabaon . unde brâhte dâ
0,32131 gote reiniclîche
0,32132 tûsent opfer rîche .
0,32133 diu got genædiclîche entvie
0,32134 des nahtes . dô er slâfen gie

0,32135 unde er entslief . im wart zehant
0,32136 gotes stimme in troume erkant
0,32137 unde leite im drîer wunsche kûre
0,32138 mit wal von im ze habenne vûre
0,32139 ob er wolte mit kraft
0,32140 an sînen vîanden sigehaft
0,32141 werden nâch sînem muote
0,32142 oder daz er von guote
0,32143 hæte die grôzen rîchheit
0,32144 oder daz im wære bereit
0,32145 diu hôhestiu wîsheit die – ieman
0,32146 bî sînen zîten nie gewan .
0,32147 Salomon der küninc wîs
0,32148 erkôs vûre dirre zweier prîs
0,32149 sigenumft . unde guotes rîchheit
0,32150 diu im dâ wâren vûre geleit .
0,32151 ze habenne . er sprach “lieber hêrre mîn
0,32152 müge ez in dînen hulden sîn
0,32153 sô gip mir alse wîsen sîn
0,32154 unde solicher wîsheit gewin .
0,32155 daz ich dîn liut verrihten
0,32156 künne . unde müge verslihten
0,32157 swâ daz reht – sich krümbe mir .”
0,32158 dô sprach got . “nâch dîner gire
0,32159 solt dû der bette sîn gewert
0,32160 sît dû der wîsheit hâst gegert
0,32161 unde sigenumft der vîande niht
0,32162 daz man die jungen mîden sihet
0,32163 in ire jugent . durch jungen muot
0,32164 unde daz dû verspræche guot
0,32165 unde wereltlîche rîchheit
0,32166 sô sol werden dir bereit
0,32167 sigenumft . sô daz dû sigehaft
0,32168 iemer sîst mit sigenter kraft
0,32169 an dînen vîanden al dîn leben
0,32170 ouch wile ich dir nâch wunsche geben
0,32171 die grôzesten rîchheit die ieman
0,32172 vore dir in küninges namen gewan
0,32173 oder nâch dir sol gewinnen
0,32174 ouch wile ich dir mit sinnen
0,32175 geben die hôhesten wîsheit
0,32176 diu mannes sinne ie wart bereit .”
0,32177 dô Salomon erwachete
0,32178 nâch slâfe er ûf sich machete .
0,32179 er vröuwete in sînem muote sich
0,32180 der grôzen gâbe sæliclich
0,32181 diu nâch wunschlîcher wîsheit
0,32182 im an wîzen was bereit

0,32183 ze habenne vüre alle die
0,32184 vore im geboren wurden ie
0,32185 unde nâch sînen zîten sît
0,32186 in der selben tage zît
0,32187 kêrte er in Jerusalem hin heim
0,32188 durch die vröuwede diu dô schein
0,32189 in sînem gemüete hôh .
0,32190 gienc er vüre gotes arke dô
0,32191 unde viel in diemüeticlîcher kûre
0,32192 got an betente dâ vüre .
0,32193 der die genâde an im dâ tet
0,32194 dô er sprach dâ sîn gebet
0,32195 rîchelîche nâch der ê gebote
0,32196 brâhte er sîn rîchelich opfer gote
0,32197 als in sîn wîsheit lêrte
0,32198 diu sich an im sô mêrte
0,32199 daz vore sîner zît nieman
0,32200 sô hôhe wîsheit mêr gewan
0,32201 dâr nâch kürzelîche an einem tage
0,32202 kâmen nâch der wârheit sage
0,32203 vüre Salomonen zwei wîp
0,32204 die durch ire unvertigen lîp
0,32205 diu schrift unvertic hât genant
0,32206 der sprach einiu sâr zehant
0,32207 dô si vüre den küninc kam
0,32208 unde er ir beider rede vernam
0,32209 “hêrre ich bite dich daz dû
0,32210 mîne klage vernemest nû
0,32211 ich unde diz wîp . wir wâren
0,32212 sament . unde gebâren
0,32213 in einem hûse zwei kindelîn
0,32214 dô wir begunden sament sîn
0,32215 alse noch genuoge sament sint
0,32216 eines nahtes erdruhte si ire kint
0,32217 unde dô si des rehte entvant
0,32218 sô daz si ez bî ir tôtez vant
0,32219 si leite ire tôtez kindelîn
0,32220 zuo mir . unde stal daz mân
0,32221 als ich dô söugen wolte
0,32222 mân kint als ich solte
0,32223 daz kint ich bî mir tôtez vant
0,32224 dô wart vile schiere mir bekant .
0,32225 daz ez mân kindelîn niht was
0,32226 unde ez daz was des si genas .”
0,32227 diu einiu sprach “dû liugest
0,32228 mit luge – – dû dich triugest .
0,32229 dîn kint ist tôt . unde lebet daz mân
0,32230 dû hâst ertoetet daz dîn

0,32231 daz mîne ich noch lebente hân
 0,32232 daz weiz ich wole gar âne wân .”
 0,32233 “niht dû hâst daz dîne
 0,32234 erdrûcket . unde daz mîne
 0,32235 verstolen .” sprach aber diu ander dô .
 0,32236 nû dô dise – kriegeten alsô
 0,32237 unde des krieges vile geschach
 0,32238 der küninc Salomon dô sprach
 0,32239 “wie sol ich diz verrihten
 0,32240 unde disen krieg verslihten
 0,32241 des alse vile geschihet alhier
 0,32242 disiu heizet liegen die
 0,32243 unde diu ander aber si
 0,32244 sô sprichet jeniu aber dâ bî .
 0,32245 dû liugest . mîn kint lebente ist
 0,32246 daz dîne ist tât .” den bezzisten list
 0,32247 den ze gerihte ie küninc vant
 0,32248 erdâhte Salomon zehant
 0,32249 ze ervindenne die wârheit
 0,32250 mit rehter bischaft underscheit
 0,32251 als ein iegelich rihtær sol
 0,32252 er wisse daz bînamen wole
 0,32253 sæhe ein wîp ire kindelîn
 0,32254 toeten . daz wære ire hôhester pîn .
 0,32255 ob ir von wârheit wære bekant .
 0,32256 daz si sîn muoter wære genant
 0,32257 dâ bî wiste er wole daz ein wîp
 0,32258 eines vremeden kindes lîp
 0,32259 vile schiere verklaget hæte .
 0,32260 ob man den tât im tete
 0,32261 wan müeter di erbarmic sint
 0,32262 erbarmet herzicliche ire kint
 0,32263 unde eines vremeden kindes lîp
 0,32264 erbarmet kleine ein – hertez wîp
 0,32265 diz kunde wole bedenken
 0,32266 unde valsche lûge krenken
 0,32267 der edel gotes degen wert
 0,32268 er sprach “bringent her ein swert
 0,32269 unde slahent entzwei daz kindelîn
 0,32270 sô ez danne geteilet sî
 0,32271 sô gebent – ietwederre dar ire teil
 0,32272 unde diu sî danne ire teiles geil
 0,32273 wan ir nâch rehte reht geschihet”
 0,32274 “nein hêrre des sol wesen niht”
 0,32275 sprach diu des kindes muoter hiez
 0,32276 der jâmer in ire herze stiez
 0,32277 sô senentes jâmers klagenten pîn
 0,32278 ob man ertôtte ire kindelîn

0,32279 daz si iemer muoste sîn unvrô
0,32280 si erschrac vile sêre . unde sprach alsô
0,32281 “niht . genâde hêrre erwint
0,32282 gip dirre lebente hin daz kint
0,32283 wande ez ist mit wârheit ir .”
0,32284 “waz ist dir her umbe . oder mir
0,32285 ob man diz kint zerteilet hier”
0,32286 sprach diu . der niht ze herzen gie
0,32287 des vremen lebenten Kindes tât .
0,32288 dem si sô ringe wac die nôt .
0,32289 als ire gebærde dâ verjach
0,32290 Salomon der wîse sprach
0,32291 “tuont her daz kint man sol ez geben
0,32292 der . diu dâ sorget umbe sîn leben .
0,32293 wan si sîn rehtiu muoter ist”
0,32294 dô gap man an der selben vrist
0,32295 daz kint der rehten muoter sîn .
0,32296 der ander tet man schiere schîn
0,32297 daz si was ein übel wîp
0,32298 man zerberte ir den lîp
0,32299 mit einem reitel grüne
0,32300 alsô wart ir ire küene
0,32301 in getriben daz ist wâr
0,32302 sehet waz wolte si dô dâr
0,32303 man tet dâ dem rehte daz sîn
0,32304 sus tet mit hôhen wîzen schîn
0,32305 ze ir aller angesichte
0,32306 sîn êrste gerihte
0,32307 Salomon der wîse degen
0,32308 unde daz er kunde wîsheit pflegen
0,32309 daz alle die sîne entsâzen
0,32310 unde sîne wîsheit mâzen
0,32311 ze der hôhesten wîsheit die got ie
0,32312 dâ vore decheinem manne verlie
0,32313 gerihte ze verrihtenne
0,32314 unde die wârheit ze verslihtenne
0,32315 des alliu sîniu rîche
0,32316 sich vröuweten algelîche
0,32317 unde getorste dannen hin
0,32318 nieman tuon niht wider in .
0,32319 Salomon der rîche
0,32320 teilte dô wîslîche
0,32321 in zwelf teile sîniu lant
0,32322 iegelîchem teile was – benant
0,32323 ein pflegær . der sîn solte pflegen
0,32324 der selbe muoste sich bewegen
0,32325 als der küninc wolte
0,32326 daz er dienen solte

0,32327 sînen mânôt durch daz jâr .
0,32328 hier bî seit ouch diu schrift vûre wâr
0,32329 von der rîchen spîse
0,32330 die der kûninc wîse
0,32331 muoste ze iegelîchem tage
0,32332 hân . nâch rehter wârheit sage
0,32333 als gotes wârheit wîset mich
0,32334 er muoste allertagelîch
0,32335 semelmelwes ze brôte hân
0,32336 swâ sîn zerunge solte ergân
0,32337 den . die ze tische wâren gesazt
0,32338 von im an der hêren stat
0,32339 unde – anders melwes als ich las
0,32340 daz in drîzic kôren was .
0,32341 unde sechzic kôre des gesindes schar
0,32342 die undergesinde . hiezen gar
0,32343 diz was tagelîche sîn brôt
0,32344 als der zerunge mez gebôt
0,32345 diu sîn . unde sînes hoves was
0,32346 an einer glôse ich daz las
0,32347 zwelif sôume sint ein kor genant
0,32348 als ein ros geladen ist erkant .
0,32349 zwelif ohsen veizet gemestet wole
0,32350 als man ein rint noch mesten sol
0,32351 unde zweinzic weitohsen grôz
0,32352 der iegelîchez slehtes nôz
0,32353 âne mestunge gar
0,32354 die weide ze lîpnar
0,32355 unde hundert widere veizet erkant
0,32356 als man dô die bezzisten vant
0,32357 ane hirze . unde ander wilt
0,32358 der zal sô hôhe was gezilet
0,32359 daz ire zal unbetrachtet
0,32360 beleip . unde gar ungeachtet
0,32361 unde an – – gevûgel des ouch sô vile .
0,32362 was . ûzwentic der – mâze zile .
0,32363 daz ez nieman geachten
0,32364 kunde noch betrachten
0,32365 ane maniger leie vische
0,32366 die man truoc ze sînem tische
0,32367 tagelîche ze spîse
0,32368 ouch hâte der kûninc wîse
0,32369 Salomon der mære
0,32370 vierzic tûsent loufære
0,32371 ros . in sînem lande
0,32372 diu man sô snel erkante
0,32373 daz in als wârheit jîhet
0,32374 die lenge mohte gevolgen niht

0,32375 deweder tal . berc . oder mos .
0,32376 dâr zuo zwelif tûsent wildiu ros
0,32377 hâte er in sînen villen
0,32378 diu er nâch sînem willen
0,32379 hielt . gap . unde selbe reit .
0,32380 als üns von im diu wârheit seit
0,32381 al die . die ringe muosten gar
0,32382 ordenen . unde ir nemen war
0,32383 die sîner ambete solten pflegen .
0,32384 wie wîse wære der gotes degen
0,32385 daz kûndet üns diu schrift alsô
0,32386 unde jihet daz in den zîten dô
0,32387 nieman an wîsheit vollekommen
0,32388 wære . unde an wîsheit ûzgenomen .
0,32389 bî den zîten als Eman .
0,32390 unde einer was genant Ethan .
0,32391 unde mit den zwêne über alliu lant
0,32392 der name wart mir niht genant
0,32393 ob den was er sô wîse
0,32394 daz von dem hôhen prîse
0,32395 sîner hôhen wîsheit
0,32396 ire wîsheit was gar geleit
0,32397 unde er wart an die hôhesten stat .
0,32398 über al der wîsheit gesazt
0,32399 die man dô über alliu lant
0,32400 bî den selben zîten vant
0,32401 oder von den man ie gelas
0,32402 sîn site . unde sîn gewoneheit was
0,32403 daz er gerne tihte
0,32404 mit tihtene berihte
0,32405 bîspel . unde guoter lêre vile
0,32406 diu den liuten alliu zil
0,32407 reht . unde wîse lêre
0,32408 hinnen vûre iemer mêre
0,32409 mit wîsen Worten lêre gebent
0,32410 der gerne wîslîche lebent .
0,32411 dâr zuo hât ouch von im geseit
0,32412 diu schrift . daz er mit wârheit
0,32413 an iegelîcher figûre
0,32414 berihte die natûre
0,32415 wie ez genatûret was
0,32416 ez wære holz . wurze . oder gras
0,32417 niht nâch mennischen troume
0,32418 unde von dem êrsten zêderboume
0,32419 den Libanus der berc noch bîret
0,32420 unz an daz mies daz dâ wirdet
0,32421 von viule . an einer wende
0,32422 berihte er âne ein – ende

0,32423 mit wîslîcher umbevart
0,32424 wie iegelîchez dinc nâch sîner art .
0,32425 genatûret was unde ist
0,32426 dâr zuo beschiet sîn wîser list
0,32427 wie allen lebenen ire leben
0,32428 von natûre ist gegeben
0,32429 nâch sîner ordenunge
0,32430 ouch tihte er beswerunge .
0,32431 mit der worte grôzer kraft
0,32432 er zouberte . unde mit ire meisterschaft .